


Dilonga Dyà

Maalu À Baadémons

Cipaapu Cyà Maalu À Ntèndeleeleu

 Ndi ndikonka ne mbanganyi bàdiku bamanyè kaamusambu kakese aka, pândi nnusekelela apa ne kapyà katàmbe bukole kàà bwobumwe bwa beena Kilisto ne dinanga dya Kilisto leelu ewu, mbanganyi bàdì bamanyè kaamusambu kakese aka kàà ne: “Ûdi Ùkukùba”? Nudi bakàmanyè anyi? Eyo, tùmônààyibi ní tudi mwa kukimba. Udi mukàmanyè anyi, mwaneetu wa bakaji? Udi mumanyè anyi? Mpindyewu:

Ûdi ùkukùba,
Ûdi ùkukùba;
Pa muunya ne mu dilèji,
Ûdi ùkukùba,

Kaa, abi's mbilenga. Tùkàteetààkù kabidi tǔng mpindyewu.

Ûdi ùkukùba,
Ûdi ùkukùba;
Pa muunya ne mu dilèji,
Ûdi ùkukùba.

[Katùpà kàà mukaba wa mēyi munda mutupu—Muf.]

² Taatù wetù wa mu Dyulu, tudi tuKusakidila bwa mÛdì utùkùba ne mumweneshe dinanga Dyebe kutùdì, mu mushindu wà ne Wàkatùma Mwan'Èbè munanga Sungasunga, bwa... Mwanà wa Nzambi uvwa kàyì mwenze bubi, bwa kwangata kaaba kàà bangènzàmpèkààtù bàvwà bapiile. Mushindu mwine wutùdì tuKusakidila's, bwa mÛvwà mutùkùbe ne mutùvùlùke bikole, bwa kwenza cyòcì eci! Ne twètù tudi ne dyanyisha dyàbùngì, Mukalenge. Tudi ne disanka dya kudisangisha mwab'ewu mu mapingaja emu, mu bipòòyì bya mu maulu, ne tulomba mabenesha Ebe pa disangisha edi. Enzaku, Mukalenge, bwa mulume yònsò, mukaji, mwànà wa balume anyi wa bakaji udi kaaba aka, àlongèku mu ndòndò mpindyewu mu Mifùndù. Tudi bakùngàmàngàne ne buloba bùdì bukòntònònyìibwe kùdì Sàtaanà. Nenku, Taatù, tudi tulomba, patùdì tulonga bukole bwa baadémons ne cìdìbo bènzela bantu apa, bwa Wèwè utùpèèshèku diitabuuja dinene, ne swaku bwa bimanyinu binènè byàbùngì ne maalu a kukema byènjiibwè. Bwalu, tudi tulomba nunku mu Dinà dya Kilisto ne bwa butumbi bwa Nzambi. Amen.

³ Tudi tubwela mu dilonga, mu mapingaja emu, tubwelamu ne lukasa lwònsò, ngeela meeji, ne tusunsa tutwè ku dikumi ne tutaanu kumpala kwa dībà. Dyôdi dicìdi anu pa *Dilonga Dya Maalu À Baadémons*.

⁴ Nenku mpindyewu ndi mfuma ku dipeta mukenji, katanci aka; Mwaneetu Beeler, wà kùdi balunda bàanyi. Nenku ndi mbangila ku Afrike, munkaci mwa ngondo wa mwandamutekete. Pa nanku aci ncikòse bwalu, twacishindiki mpindyewu. Kadi Mwaneetu Baxter kèna mwa kuya mu cyôci cikondo aci to, pa nanku nebikengelè bwa nye mèmè nkààyaanyi ku Afrike. Nenku nênyekù pamwe ne. . . byênzekèku ne. . . Bikèngela nunsambidileku mpindyewu, bwa Mukalenge wànkwacishakù, bwalu nêngìkalè cya bushuwa dijinga ne disambila mpindyewu, kuntwaku munkaci mwa. . . Ndi ntekemena bantu bôbò bakese kî mbângi kî mbângi binunu nkama yibidi mu diine disangisha adi.

⁵ Nenku ndi ne cikeena-kumona cifùnda kaaba aka. Ndi muswe bwa nwênù kukùtuucila dyakalenga. Cìvwa cyenzèke mu ngondo wa dikumi ne mwibìdi. Mvwa nsanganyiibwa mu cibambalu mu dinda kampanda pàkabwelà Mwanjelo wa Mukalenge. Mèmè. . . Nudi numona's, pâmvwà kuntwaku apu, ngàkashikukila Nzambi, ki mèmè kupeta disaamà dya amibes. Muntu kanà yònsò mmumanye—mmumanye cidi amibes, nkìshì kàdi kàbwelà. . . kàmba kukushebeya. Ciine aci mbwalu mvwa mwenze cintu kampanda cìvwà Nzambi mwambe ne ncyènji to. Mbanganyi bàtù bumvwe bwalu-bulonda bwa cyôci aci? Ngeela meeji bamwe bàà kunùdi bàdi kaaba aka. Ndi mumanye ne beena mu tabernacle bààkumvwa bwalu-bulonda bwa cìvwà cyenzèke aci. Nzambi ùvwa mungambile bwa kuya ku mwaba kampanda, bwa kushààla kule ne mwaba *kampanda*, ne kwalukila kuya ku mukwabo mwaba. Kadi mèmè kulekela bayiishi abu bàntwishisha bwa kubenga kucyenza. Mpindyewu, bayiishi's mbantu bàà bwalu bukole, kadi mbànà beetu's, kadi wadimuka bwa cidi Nzambi ùkwambila. Ncya bushuwa. Nwamonu anyi? Wèwè udi ne mudimu wumwepele wà diya kenza.

⁶ Mbanganyi bàdi bavùlùke ne musangu kampanda kùvwà baprofeta babidi mu Bible? Kadi umwe wa kùdibo, Mukalenge wàkamwambila, wàmba ne: “Nda ku mwaba *kampanda*. Kadi kùlwidi—kùlwidi mu. . . Wàlukidilè njila mukwabo,” ne bikwabo. Ne—ne kwambaYe ne: “Kùdi anyi kùnu kantu pawìkalà kuntwaku apu to.”

⁷ Kadi mukwabo muprofeta mulelela kusambakeenaye nendè, kumwambilaye ne: “Mukalenge mmutwilàngàne naanyi paanyima pàà Yèyè mumane kutwilangana neebe.” Nenku kwambaye ne: “Lwà tuye kwànyi kumbelu.” Ki muprofeta awu kuteelejaye cìvwà mukwabo awu mwambe, ki kudifwishayè bwa

bwalu abu. Nwamonu's, wêwè enza cidi Nzambi ùkwambila bwa kwenza nansha cidi mukwabo muntu wàmba ciikàle cinyi.

⁸ Mpindyewu tudi... Mu ciine cikeena-kumona eci, Yèyè... Kuntabulujaci, mu matuku dikumi ne asatu a ngondo wa citeem-... anyi wa dikumi ne mwibidi. Nenku—nenku pâmvwà musòmbe ku mwelelu wà bulaalu bwànyì, mvwa ndikonka cìvwà mwa kwikala matuku àànyì àcìvwavwà. Mémè... Pângààkaalukilà kuneeku, mémè's nkaavwa wa bàya keela mu nzubu wa beena cikupi, twishì twa màsaamà tũkaavwa anu twambe kumpitula. Kì kungenzabo diteeta pângààdyaci mu ditunga edi. Kadi, ku ngàsà wa Nzambi, bôbò kundekela anu cyanàana mémè kuya kwànyì kumbelu, bwalu ntutampàkàne bikole. Kadi mvwa musambile, muye kùdi bambi abu, mwambe ne: “Mukalenge mmungambile bwa ncìyiyi njila awu to.”

Kwambabo ne: “Kya, Nzambi's ùdi mwa kwakula ne kampanda mukwabo pa kuumusha wêwè.”

⁹ Mémè ne: “Koolà's wàkapeta awu mmwenenu musangu kampanda.” Kì pa nanku, kadi mémè kuya e kwangata mabeji kampanda a mici ne kuàtèeka pa makàsà àbò, ne kwamba ne: “Nwavulukaayi, mu Dìna dya Mukalenge ne, twètù baye mu lwendu alu, netùpangilè bwalu, ne twètù bônso netùyooobè bwa bwalu abu.” Nenku twákayooba cya bushuwa! Kaa, ekelekele! S'twákamba kufwa twètù bônso. Kì dìbà adi mu dyalukila... .

¹⁰ Udi ne byàbúngì bìdi bikulwisha mu matunga a ku baabèndè awu. Cileejilu, kankùpà kakese nkafwànyine kukusùma, cìfwànyine kukupeteshà mubidi-kapya wà nkùpà. Nenku kantu kakese aku, pàdiku kàkusùma, wêwè mumvwe mwaba awu wùkusansakana, kwèna mwa kudikoonyapù to. Udi utàngila, kòkò kiikàle kalumyana kakese kafiike aku, kùkàtùulukù to. Kàdi ne kaamutù kakese, kàdi kàtùbula disòsò kàbwela mu dikoba, kàdinyùngulula mushindu *ewu* ne kàdishimacisha bikole. Wêwè mudìdinge anu mukàtùulè, udi mufwànyine kukàtùula kadi kaamutu aku kàshàalamù. Kàdi ne kishì munda amu, kadi kafwànyine kukucibwila panshi. Kì yèyè... Kùdikoonyiku to, anyi kùkàtùulukù to; angata anu ndambu wa bífutàfutà. Ne kòkò kàtu kàpuuyakeena paanyima pààkù apu. Kàmacishilè bífutàfutà abi, nenku kàdi kàpàtuka.

¹¹ Pashiishe kùdi kamwe kakese. Kakeèna kènza mutooyi nansha mukese to. Kàdi kàlwa anu mu lupeepa amu. [Mwaneetu Branham ùdi ùdituuta kaadipì pa cyanza cyèndè yèyè mwine—Muf.] Kàdi anu kàkulenga cyanàana, kwajiki, wàpeci màlèyalèya.

¹² Ne—ne pashiishe kùdi cìdìbo bàbiiikila ne nyoka wa ntòokà wa diitu. Yèyè mukusùme, udi ushàala ne mwoyi anu bwa tusuna tutwè ku tubidi cyanàana paanyima pàà yèyè mukusùme.

13 Ne kùdi nyoka wa mpyapija wa kàlaabi. Udi ushààla ne mwoyi bwa tusunsa tutwè ku dikumi ne tutaanu paanyima pàa dikusùmà dyèndè. Ne umwe wa ku yôyi ùkaavwa anu pabwîpî menemene ne mwanàànyî wa balume, bya yèyè mufwànyine kutèèka cyanza pa mutu wèndè apu. Ùkaavwa mumane kujuuka, bwa kumusumaye, kumpala kwa twètù kumwasa, mushindu ewu.

14 Ne kùdi nyoka wa mpyapija mufiike. Kaa, mùdì anu bintu byònsò naka's! Ne pashiishe njiwu ya nyama ya cisuku, mu bushuwa bwa bwalu, nyama ya ntambwe, cisumpantambwe, anyî nkàshààmà, ne bikwabo byònsò bwa kulwangana naabi, mu bisuku ne meetu amu. Ne pashiishe màsaamà, mùdì anu màsaamà a mishindu yònsò muntwamu.

15 Nénku udi ne byònsò abi bwa kukùngamangana naabi pawàyàku. Pa kuumusha abi, pashiishe ki bampàkààmàngà bwa kukwela tudyòmbò ku nseke yònsò, nwamonu's, ne miitabuujà àbò ónsò a majimbu awu ne bikwabo byònsò. Kadi, mushindu mwine, cintu cilenga kaayi cya kumona Mukalenge wetù ùbisàka anu kule, ku nseke ne ku nseke, mushindu awu, pashiishe tutùngunuka.

Nénku dituku adi ndi mvuluka, mwimane mwaba awu, bîmpè menemene, cyàkenzekà aci, nènñulondèlèbi musangu kumpala mu disangisha dikwabo, bwalu ndi muswe kubwela mu cyena-bwalu cyànyî mu mapingaja emu, dya *Dilonga Dyà Maalu A Baadémons*.

16 Kadi mpindyewu, nénku eci mvwa ngeelanganapù meeji, musòmbè mwaba wàwa ne, ciikalà ndekeelu ncinyî? Nénku mu dyalukila twenda tukosolola mbû, ndi mumanye ne tuvwa bakùdimwishe mucima bantu batwè ku binunu lukama patùvwà kuntwaku apu. Ki Mwaneetu mukulumpe Bosworth kulwaye kùndi. Kwambaye, mèmè kwamba ne: "Ee, Mwaneetu Bosworth?"

17 Yèyè ne: "Ndi ndyumvwa maleela be bwebe wèwè, Mwaneetu Branham!" Yèyè ne: "Wèwè ucidi anu—ucidi anu ku ntwadijilu wa mwoyi's," mwàkambàye.

18 Mèmè ne: "Ee, s'ngeela meeji ne kwònsò nkumane kujika's." Mèmè ne: "Nkàadi mupite bidimu makumi anaayi. Ndi ngeela meeji ne ndi mulwangane mvita mîmpè ne mujikije lubilu."

19 Yèyè ne: "Mupite bidimu makumi anaayi?" Yèyè ne: "Mèmè's mvwa ne bidimu abi kumpala kwa mèmè kukùdimuna mucima." Yèyè ne: "S'ncidi anu pa mèmè." Yèyè ùkaavwa wîpacila bwa kubwela mu makumi mwandamukulu. Kadi anu . . .

Mèmè kudyàmbidila ne: "Ee, pàmwàpa aci cidi bu cya bushuwa's."

²⁰ Ki yêyè ne: “To, wêwè’s udi anu Branham mupyamupya menemene mpindyewu. S’nyawu wâmanyi mwa kukontonona masangisha èbè bilenga, ne bikwabo byônsò.” Yêyè ne: “Bu wêwè anu mwa kubangishaku ne Amerike mu mushindu mujaalame, ne disangisha dya ndongolwelu mujaalame, mùdì mwa kushààla mbingu yisambombo anyi mwandamukulu kaaba kâmwè, ne mudilongòlòle ne mudyènzèle mamanyisha myaba yônsò,” yêyè ne, “wêwè’s udi mufwànyine kwenza cintu, kadi, ne bwa Mukalenge wetù.” Ki twètù kutungunuka, tuyiikila anu mushindu awu, ki muyiiki kwikalawu yelenga wà dikema—wà menemene.

²¹ Dìbà adi paanyimà pàà katanci, mêmè kumona cikeena-kumona, pâmvwà mu Amerike, ne kulwaci kùndì, ne kungaalujaci mu Afrike, ne kundeejaci disangisha dimwedimwe adi, disanganyibwa kumpala kwa Durban aku. Ki disangisha dya kumpala adi kujiminadi e kubweladi mu maalu-malonda, dya ditàngile ku Wesete. Disangisha diibìdì kujuukadi ne, ndyenzè anu djiuuka, divwa anu dyalàbàle kutàmba mùvwà disangisha dya kumpala adi. Neku Yêyè... Mêmè kuumvwa lubila lukole, ne Mwanjelo kampanda ùvwa wènda ùpàtuka mu Dyulu; Ùvwa ne bukènkè bunene.

²² Ki Mwanjelo wa Mukalenge udi mwimane ku luseke lwetu kaaba aka ewu, ùvwa mwiman-... ùtu misangu yônsò anu mwimanyine ku dyabalume dyànyì, lwà ku *elu* luseke. Neku Cìvwa ciimàne mwaba awu, ne Cìvwa—Cìvwa cyènda citentemuka. Neku mêmè kumona Muntu ewu mwimane mwinshi Mwèndè. Yêyè—Yêyè kèna... Mpindyewu, aci kî ncikeena-kumona to paùdì uMumona Yêyè. Ncya dya bushuwa anu munùdì bantangle mêmè amu. Kaa, wêwè’s udi mwa kuumvwa mùdìYe wènda ne wàkula neebe. Neku Yêyè mmwenzè anu... Cintu kanà cyônsò, cìdì anu cya dya bushuwa eci. Neku kî ncikeena-kumona to; Muntu awu mmwimane mwaba awu anu mùdì wêwè mwimane amu. Ne dîyì Dyèndè ndya mwomumwe anu mùdì dyànyì difwànyine kwikala anyi mùdì dyebe difwànyine kwikala amu. Kadi cikeena-kumona, ncintu cidi cibwayika kumpala kwebe ne ucimona, mushindu ewu. Kadi ewu Muntu ùdì anu ùseemena cyanàànà ne wìmana mwaba awu.

²³ Pa nanku kungambilaYe ne... cìvwà mwa kwenzeka aci. Ki kwambaYe ne... Mwanjelo ewu kutuulukaYe, ne kungambilaYe bwa kukudimuka ne kutangila mu *nunku*. Neku cìvwa citàngile ku Inde, dìbà adi. Ncyèna ngamba ne mmu Inde to, kadi mpabwîpi. Kadi bàvwa mba-Indiens.

²⁴ Bwalu, beena Afrike bôbò bàtu bantu bàà banene, bapàyàme, bàà mmwenekelu wa bujitu ne banene. Bamwe bàà kùdìbo bàdì bule bwa bwìpacila mètres abidi ne ndambu, ne bujitu, kaa, bwa kilô lukama ne makumi abidi ne mwandamutekete, lukama ne makumi asatu ne yisambombo,

ba-pà-yà-me. Ba-Zùlù, mpindyewu, ba-Shunghi ne Basutos, ne, kaa, bàdi bisàmbà bishiilèshiiàngàne. Pàvwa bantu bàà bisàmbà bishiilàngàne dikumi ne bitaanu basòmbe mwaba awu dituku adi, bàmvwà ngaakula naabo.

²⁵ Mvwa ngamba mwaku wumwepele, bu mùdi: “Yesu Kilisto, Mwànà wa Nzambi.” Mvwa mufwànyine kuya kanwà màyi kumpala kwa kupicilaci kùdi bandamunyi bônso. Umwe ùvwa wàmba . . . Ne mitooyi yónso ayi!

Kale wàwa mvwa ndyàmbedila, pàmvwà ngumvwa beena Mpenta bàakula mu myakulu, ne pàmwàpa umwe ùvwa wàkula mu cyonà cya mushindu kampanda ne mukwabo wàkula mu dikwabo, mmunyi mùvwàbi mwa kwenzeka? Kadi ndi ngiitabuuja ne Bible mmubinge, ne ndi mumanye ne Yéye mmubinge, pàdiYe mwambe ne: “Kakwènakù cyonà cidì kaciyi ne cidìci cyùmvwija to.” Aci ncyà bushuwa.

Bamwe bàà kùdìbo bàvwa bàmba, umwe wa kùdìbo wàmba ne: “Brr brr brr brr,” cyùmvwija ne “Yesu Kilisto, Mwànà wa Nzambi.” Mukwabo wàmba ne: “Cyokò cyokò cyokò cyokò,” mbwena kwamba ne “Yesu Kilisto, Mwànà wa Nzambi,” mu wèndè pèndè mwakulu. Pa nanku cyonà nansha ciikàle cya mushindu kaayi, cidì ne dyumvwija mu mwaba kampanda. Ncyà bushuwa. Mutooyi nansha mwikàle wà mushindu kaayi, wùdi wùmvwija cintu kampanda bwa muntu kampanda mu mwaba kampanda. Nenku pàvwàYe . . . Bàvwa bàbyàndamuna.

²⁶ Ki mèmè kumona ne lwà ku dyàbakàjì dyànyì, pàakatùuluka Mwanjelo awu ne mèmè kumona bu cisumbu cinènè cya bantu kuntwaku, ne bàvwa mbantu biikàle ne . . . bàmwèka bu ne bàvwa ne—ne kaacilàmbà kajìngila pambidi, nunku *ewu*, ne kàvwa kabàjìngila pambidi ne kabàswikilapù, byenzè bu kajìngila mwànà mukese wa mu diboko, mukààya. Ne kàvwa nkòkò. Nenku mvwa mmona too ne kule menemene, anu bantu pa bantu. Nenku pashiishe Mwanjelo ewu kuteemeshaYe bukènè bunene bwa bùyunguluka, ne kubangabu bùtwa kumpala bùtwa paanyima, nunku *ewu*. Ne kacya bandela ncìvwakù mwanjì kumona bantu bùngì nàka to!

²⁷ Ne pashiishe Mwanjelo mukwabo ewu kuseemenaYe pabwìpì naanyi menemene, ne kwambaYe ne: “Mùdi bantu binunu nkama yisatu mu disangisha adi.” Ne ndi naaci cifùnda kaaba aka. Nenku nwènù nùcifùndaayi mu dibeji dya mukanda dya mushindu kampanda, bu mungààkalondà bwa mwànà wa balume mukese wàkabiishiibwa ku lufu mu Finlande awu. Fùndaayi aci pa dibeji dya munda mutupu dya Bible wenù adi anyi mu mwaba kampanda ne, mu disangisha edi (Nekwènzekè disangisha. Ne nenùdyùmvwilè mu citangalaji kampanda cya ngumu.) dya bantu binunu nkama yisatu bàdi bàlwa mu disangisha adi. Mpindyewu, tàngilàayi numone ní kí ncyà bushuwa. Adi’s nedìikalè misangu yisatu dinene kutàmba

mùvwà dikwabo adi. Nwamonu anyi? Bantu binunu nkama yisatu bààlwà mu disangisha adi. Ne mêmè ndi anu ne disanka be bwa kupetakù mushindu wà kukùya, ndi mupange ne cya dyenza, bwalu mêmè ntu muswe kupetela Mukalenge wetù misuuka.

²⁸ Nenu kwòkù aku, musangu wumwepele, pa kumona—pa kumona bampààngaanù bajimà anu beetu bàà bajimà aba binunu makumi asatu bàlwa kùdi Yesu Kilisto ku dibiikila dya ku cyoshelu dimwepele, bampààngaanù bajimà anu beetu bàà bajimà aba binunu makumi asatu.

²⁹ Mpindyewu tuyaayaaku ne lukasa lwònsò ku cyena-bwalu cyetu. Makeelela tuvwa bayiiè pa ngenzèlù wa démons. Mwana nnana lungenyi leelu ewu, pàdi Nzambi ùkwàta naanyi mudimu apa. Kanwèna bamanye ne cidi mbudishikaminyi kaayi bwa kupatuka kuya to. Mpindyewu, mêmè nçitu mulongeshi to. Ndi kule be ne kwikala mulongeshi muumvwiji wa—wa Bible. Ne ndi... Dyanyi dilonga dya kalaasa ndishiikile mu kalaasa kàà mwandamutekete. Pa nanku aci cidi... Nenu, aci, ndi mulekele kalaasa kùkaadi bidimu bitwè ku makumi abidi ne bitaanu, nenu's kùkaadi ntanta mule kacya ngaamùumuka. Nenu ncyèna ne dilonga dya kalaasa dyàbùngi menemene to, kadi cyònsò cindiku mumanye nçindi mpetela ku disonsodiibwa. Kadi disonsodiibwa adi dyòdi kadiyi dikùmbanangana ne Bible to, dîbà adi ndya mafi. Nwamonu anyi? Bidi bikèngela cìikalè Bible. Disonsodiibwa nansha diikàle dya munyi, bikèngela dilwe... Eci ki cishimikidi cya Nzambi. Cikwabo cishimikidi kacyakatèèkiibwa to pa kuumusha Eci. Nenu cidi Eci aci, cindì ngamba cyòci cibèngangana ne Eci, mèyi àànyi ikalè mashimi, bwalu Eci ki Bulelela. Nwamonu anyi? Nwamonu anyi? Ne mwanjelo yèyè munwàmbile cintu cya cifwànyine kubèngangana ne Eci, Pòlò mmwambe ne: “Èdiibwè mulawu bwenu nwènù,” nansha mene mwanjelo wa Bukènkè. Mpindyewu, kùdi bintu binène byàbùngi. Ndi anu... cimwepele... Ndi musungule matuku abidi, bwa kufikisha cyena-bwalu eci kùdi bantu, ciwva mmakeelela ne leelu, mu masangisha a mu mapingaja.

³⁰ Mpindyewu, cindì mwenzele cyòci eci, mbwa ne mêmè mwine nteete ndambu bwa kumona Nzambi nî mmufwànyineku kungambulwisha. Kùdi cintu kampanda pa mwoyi wanyi. Ne cidi ne, mbwa ne, paanyima pàà Mukenji munene ewu, ne paanyima pàà Nzambi Yèyè mushindike cindì mwambe ne m'Bulelela aci, mu Diyì Dyèndè; ku Diyì Dyèndè, dyambedi, ne pashiishe ku bimanyinu ne maalù a kukema. Mpindyewu, ndi ngeela meeji ne, mwikàle ne Bulelela bwa Evanjeeliyo bwa kufila kùdi Ekeleeziya, mêmè ndi mwenzejiibwe, kùdi Nzambi, bwa kutwadila Ekeleeziya cyòci eci. Ncya bushuwa. Bòbò mbatàmbe kutapuluka, mu malongolodi mashiièshiiàngàne bùngi cyanààna ne tutùpà twa dikosolokangana twàwù, mu mushindu wà ne cyàbiiipi. Tudi bònsò bàna bàà Nzambi patùdi

balediibwe cyakabidi, Cyôci aci, nwamonu's. Ne bulelela bwa bwalu bùdi ne Nzambi mmuswe bwa twétu kumanya ne, ne tudi bânà Bèndè.

³¹ Mpindyewu, vùlukàayi ne, ntempelu wa Solòmò wàkasongùbwa, pa buloba bujima. Nenku ki dibwe ndyôdi edi dilwa dikònyàngàle mushindu ewu, ne dikwabo dikònyàngàle mushindu wàwa, ne dikwabo disonga mushindu ewu, ne dikwabo disonga mushindu wàwa, kadi, pàakalwàwu pamwe, kakùvwa mwadi wa scie nansha mukese to, anyi mukùmà wà nsandu to, kantu ne kantu kàakaya anu pa mwaba wàkù. Nzambi nguvwa Mufidi wa mèyi a kulonda mu bwalu abu.

³² Nzambi ùdi ne ekeleeziya udi ubiikidiibwa ne ng'Assemblées, ne mukwabo ne ng'église de Dieu, ne mukwabo ne *ncikampanda*, ne munga ne *ncikansanga*. Nenku, kadi pàadisangayi yònsò pamwe, s'neyiikalè cisumbu cinènè cimwepele cya dinanga dya bwànà bwetu, ne Nzambi's neàteekè, neàsangishe Ekeleeziya awu pamwe ne neàbandè Nèndè mu dyulu.

³³ Dizòla dyònsò ditù dyendè luumu edi, kumpala kwa kudikùdikabò mu cibambalu cya mazòlà ne mpìngù, bìdi bikèngela bwa kudikùdikabò, kwanji kupiciladi mu cibambalu cya badyudi, dyambedi. Muntu wàkazòla...?.... anyi, mfwilaayikù luse, ncyèna mwa kuvuluka dìnà dyèndè to, ewu wàkazòla Didyà Dyà Ndekeelu awu, kakwèna bwalu to kadi, cyàkamwangata matuku èndè ònsò a mwoyi. Wàkenza dizòla adi. Cyàkangata bidimu bu makumi abidi nanku, anyi bidimu dikumi, ngeela meeji, pankaci pàa kuzòla kwa Kilisto ne kwa Yudààsè. Kadi nutukù bafikè ku dimona ne, mu dizòlà dya dyendè luumu adi, muntu umwèumwè wàkaleeja mpala wa Kilisto awu, paanyima pàa bidimu dikumi yèyè ngwàkaleeja mpala wa Yudààsè anyi? S'ncyà bushuwa. S'nyèyè. Bidimu dikumi bya mpekaatu, kuumuka ku mwimbi munene wa misambu ya dicyonkomojangana naayi, bwa kwangata kaaba kàa Kilisto, kadi kulwa kwangata kaaba kàa Yudààsè. Wèwè kabyèna bikukèngela bidimu dikumi to. Bìdi bikèngela anu tusunsa dikumi, bwa kwenzaci cintu cimwecimwe aci pa wèwè. Necishintululè ngiikàdilù webè, mu mpekaatu. Kadi, nansha nanku, dizòla adi dyàkopicila kùdi badyudi bònsò.

³⁴ Nenku ki cìndi ndyàmbidila bwa Ekeleeziya wa Nzambi, cisumbu cidì cibìikidiibwa nanku. Ee, ncyèna ngamba aci bwa kwelulwilangana nansha. Nkàadi mwendèle mu mazuwa a màyi pa mbù mwandamutekete, ne ndi mu lwendu lwànyì lwisâtù lwà diya pa buloba bujimà, kadi bantu bàtu bàmba ne: "Munsantu mubunguluki wa mu malaba! Munsantu mubunguluki wa mu malaba!" Kadi ndi mukebulule pa buloba, ncyèna mwanjì kupetakù munsantu mubunguluki wa mu malaba to. Adi ndìnà didi dyabulu mutwe bantu. Kwajiki. Cintu pàaci ne mmunsantu mubunguluki wa mu malaba kacitukù to. Ne ndi ne

makumi mafwànyikija a ekeleeziya yònsò nkama yisambombo ne makumi asambombo ne mwandamukulu mishiileshiiàngàne yìdiku, ne mivwijiiḅwe malongolodi pa buloba, kakwèna nansha umwe wa kùdìyi ùbiiḅkidiibwa ne m'Bansantu Babunguluki bàà mu malaba nansha. Nenku aci ncifume kùdì mbulamatadi. Kakwèna ekeleeziya Munsantu Mubunguluki wa mu malaba nansha umwe ùndiku mumanye to. Pa nanku, cìvwa anu cintu cìdì dyabulu mufile bu dìnà. Kadi, mpindyewu, mu byònsò ebi, bintu byònsò ebi, Nzambi mmuzòle dizòla kampanda. Ne musangu kampanda ekeleeziya mikese ya kale eyi yìvwa kaaba aka, bamwe bàà kunùdì . . .

³⁵ Ndi ntangila bamwe balume bàà mvya aba. Mwanàànyì wa balume, makeelela awu; mvwa nsanganyiiḅwa mu birò, munkaci mwa kulonga, ki mwambi kampanda kulwaye ne kwambaye ne: “Ndi muswe kulabulanganakù ku cyanza ne papa webè.” Mu bushuwa bwa bwalu, mwanàànyì wa balume awu ùtu mupete nkolèshìlu wa kùdì Mwaneetu Baxter ne bakwabo abu, bàtù bòbò anu ne: “To,” kwajiki, ne lukasa lwònsò. Mémè ncitu muswe bya nanku awu to. Nwamonu anyi? Nansha yòbi ne mémè . . . Mu bushuwa bwa bwalu, ncyèna mwa kwikalà eku musadidi wa bantu, eku kabidi wa Nzambi to. Kadi ndi ngeela meeji ne ntu muswe kulabulanganana ne bânà beetu ku cyanza. Ntu muswe kwenza nanku. Kùdì cintu kampanda mu cyòci aci, ntu muswe kulabulanganana ne—ne mwambi ku cyanza. Kì ng’anu mwambi to, kadi mwànà wa Nzambi kanà yònsò, ntu muswe kwenza nanku. Ncivwa mucimanye to anu pààkalwà mukajàànyì kucingambila pashiishe ndambu. Ee, bu ne yèyè wàkambilakù mwambi awu ne: “Anjì indilàku kakese, ùdì paanyima pààpa ùsambila, nenku—nenku nèngǎnjì kumona cìdìye mufwànyine kwamba.” Ee, aci, aci’s cìvwa mwa kwikalakù cimpè. Pa nanku mémè kumulongololakù ndambu pa bwalu abu, bwa kiikadi wènza nanku to. Nwamonu anyi?

³⁶ Nenku ncyà bushuwa, kwèna anu mwa kupatuka dyakamwe to, bu mwàmbi mwaneetu katanci kakese aka. Wèwè mwenze nanku, pashiishe mu mēbà a bufuku’s ndi—ndi ncyoka, nudi numona’s. Bantu bàdì bàdìtwa mu dyakula, pàmwàpa muntu yònsò mwikàle ne bubeedi kampanda, ne pàdìbo bàdìtwa mu dyakulapù, ne lukasa lwònsò, ki Mwanjelo wa Mukalenge awu bwa kwamba ne ncikampanda.

³⁷ Kùdì muntu musòmbè, muntangile buludi mpindyewu, udi mumanye ne ncilelela, cilwè kùkaadi anu ndambu wa tusunsa, anyi kùkaadi bu dībà dijimà ne citùpà nanku awu. Inàbànzà kampanda musòmbè kaaba aka, uvwa kàyi mumanye ne cìvwa ncinyi to, uvwa Mwanjelo wa Mukalenge mwakule nendè dilòòlo adi ne mumwambile cintu kampanda, kadi yèyè kàyi mwa kucyùmvwà to. Kadi leelu ncyaci cyènzèkì, pa nanku yèyè wàmànyì mpindyewu cidìci cyùmvwija pàvwàYe wàkula nendè apu. Ne mùvwàbi ne, pàmvwà mwimane mwaba awu

ngaakula nendè, Mwanjelo wa Mukalenge mmupingane buludi paanyima apu ne mumwambile cìvwà lutatu lwèndè, ne byònsò bìvwàku, ne—ne cìvwàye wèla meeji, ne umwe wa ku bananga bèndè, ne mùvwà Nzambi mwakule ne mwambe ne Yèyè ùvwà mucishindike, ne cìvwà mwa kwenzeka. Pa nanku ki mushindu awu menemene wikalàci. Nwamonu anyi? Nzambi nguvwa mwambe nanku.

³⁸ Ee, mpindyewu, twámbe bishi bwa ndambu wa misangu yikaavwa...Dìbà adi, ne cikeena-kumona cyònsò ciikàle cìkutekesha bikole mushindu awu, nwamonu's. Ne katanci aka anyi, paùdi ufika ku ekeleeziya diloolo, udi mucyoke anu menemene mu mushindu wà ne mbikukolele bwa kumanya cya dyenza. Nenu nunsambidilaayi mpindyewu, nwamonu's, bwalu mbya mpàtuka mu edi disangisha nya ku dikwabo, nya ku dikwabo. Bu ne edi disangisha ndìvwà anu dyòdi nkààyaadi, nunku mbishiilàngàne, bu ne mvwa ne cya kwalukila kwànyì kumbelu mpindyewu ne ncìyi ne cintu nansha cimwe cya kwenza munda mwa ndambu wa ngondo, kuya kangata ndobo wanyì ne kuya mu diloba. Kadi nyawu bikèngela bwa ngumuka ku edi disangisha nya buludi ku dikwabo, ngumuka ku edi nya buludi ku dikwabo, nudi numona's. Ki cidi cyenza ncyòci aci.

³⁹ Nenu nùsambilàayi nwènù bònsò, nwènù bàdi mu batèeleji emu aba. Bàvwa bangambile makeelela dilòlò awu ne mvwa—mvwa ngaakula ne muntu kampana, kadi muntu awu kàyi wàdamuna ku dibikila to. Mpindyewu, aci ncyà njiwu menemene, nudi numona's. Pàvwàbo bàmba ne bìvwa...Ee, mîngà misangu nzembu eyi kàyi yiteema to, kùdi kaaba kàdi mîdimà pankaci apu.

⁴⁰ Ne mêmè ndi ntàngila Mwanjelo wa Mukalenge pàdiYe wimana kaaba aka, ndi mwa kucyùmvwa. Pashiishe ngumvwa ne mùdiCi cyùmuka kùndi, ne nèntangilè, neCyùmukè kùndi ne neCìye mwaba mukwabo kampana ne kwimanapù ndambu, ne mêmè ndi mwa kuCimòna. Ne neCìpenyishè bukènkè ne nekùlwe cikeena-kumona. Dìbà adi nèmmonè cikeena-kumona aci. Nèntangilè bwa kumona ne mmwenekelu wa mushindu kaayi udi nendè muntu udipù awu. Njandula muntu awu, dìbà adi ngaakula. Ki cidi cyènzekà ncyòci aci. Ki cidi cyènzekà ncyòci aci. Kabyena bikèngela bwa nwènù kucyàmbila bantu bònsò to, kadi ki—ki cidi cyènzeka, nudi numona's. Byònsò bidi mu cipaapu cya nyuma.

⁴¹ Dìbà adi muntu awu yèyè kàyi wàdamuna to, ncifwànyine kwikala bu kubala Bible mwab'ewu ne kwamba ne: "KaCyena ne bwa nsongo to," kadi kuumukaKù. Nwamonu anyi? Pa nanku aci's cidi cìcìvwija cibi be. Pa nanku ikàlà mubàwùle maci, ikàlà mutèèlèje, ikàlà mutabale. PàdiYe wàkula, andaàmuna. Nwamonu's, ikàlà anu mudilongòlòle bwa kwandamuna dìbà kanà dyònsò.

42 Pa nanku mukàjàànyì, ne Mwaneetu Beeler ne bààbûngì bàà kùdìbo, mu dinda emu, bàvwa bàcingambila, bàmba ne civwa cibìikila muntu pa bìdì bìtàngilà mwanaabo wa balume, mwaba kampanda, uvwa ne cintu cimusaama, ne bikwabo. Kadi muntu awu yéyè kàvwa mwandamune ku dibìikila adi to, dîbà adi aci kakùvwa cya dyenza to. Aci cìdì pankaci pàà Nzambi ne muntu awu. Cikeena-kumona aci kungumukaci. Dîbà adi ncivwa mwa kucìpeta kabidi to, bwalu kàvwa mwandamune to. Pa nanku, ikàlà mutabale, ikàlà mubàwùle maci.

43 Mpindiyewu tudì twangata cyena-bwalu eci cya *Dilonga Dyà Malu À Baadémons* bwa kwakula pa baadémons. Mpindiyewu, bantu, paùdì wamba ne “démon,” dyakamwe bàdì bàbanga kwela meeji ne: “Kaa, dikolesha dya maalu anyi cintu kampanda!” Kadi démons pààyì’s nyà cya bushuwa anu mùdì Banjelo amu. Nyà cya bushuwa anu menemene.

44 Ne dyabulu ngwa cya bushuwa dyabulu, anu mùdìbi ne Yesu Kilisto m’Mwànà wa Nzambi amu. Yéyè’s ndémon! Dyulu ndya cya bushuwa anu dyetu dya menemene edi. Ne kwòkò kakùyi cintu pààci ne ny’iferno, kakwena cintu pààci ne n’Dyulu to. Ne kwòkò kakùyi babènèshìibwe bàà Cyendeleele... dinyooka dya Cyendeleele’s wè, kakwena babènèshìibwe bàà Cyendeleele to. Kwòkò kakùyi mundaamuunya to, kakwena bufuku to. Nwamonu anyi? Kadi anu mùdìbi bushuwa ne mundaamuunya mùdikù amu, bufuku bùdikù. Anu—anu mùdìbi bushuwa ne kùdì—bushuwa ne mwena Kilisto ùdikù amu, mwena lubombo ùdì ne cya kwikalakù. Anu mùdìbi bushuwa ne muntu kampanda udi mushùwashùwàlè wa kùdì Nzambi ùdikù amu, muntu kampanda ùdikù bwa kutentula cyòci aci. Nwamonu anyi? Bidi menemene anu cya bushuwa ne cya mafi, cifilke ne citòòke, anu nanku too ne mu nsòmbelu mujimà mu byònsò, cilelela ne cya mafi myaba yònsò. Nenku kùdì evanjeeliyo wa mashimi, kùdì Evanjeeliyo mulelela. Kùdì Dibatiiza dilelela, kùdì dibatiiza dya mashimi. Kùdì diitabuuja dya budingibudingi, ne kùdì dya cya bushuwa. Kùdì ndola mulelela wa Amerike, kùdì ndola wa mafi wa Amerike. Kùdì mwena Kilisto mushùwashùwàlè, kùdì mwena lubombo mushùwashùwàlè, nwamonu’s, ùdì yéyè anu ùtentula. Nenku tudì tusangana nanku, nenku byònsò bìdì byenda pamwe. Mpindiyewu, katwena mwa kubitapulula nansha. Nzambi ùdì ùlekela mvula ùlòka.

45 Yéyè àndekèlèku ngààkulè kaaba aka anu katanci kakese cyanàànà. Mbanganyì bàdì bayiishi kaaba aka? Elààyi byanza muulu. Myaba yònsò, bayiishi, tùmònààyibì byanza byenu. Ee, Nzambi ànùbènèshè, bàrà beetu. Mpindiyewu, mpindiyewu, kanwàngaci eci bu dilongesha dya nshindameenu to mpindiyewu, kadi, anu kumpala kwa twètù kulenga cyena-bwalu cya mushinga mutàmbe bunene eci, nènwnwàmbilè ne bwalu bùdì cinyi. Mbanganyì bàdì beena Mpenta kaaba aka? Elààyi byanza

muulu, mu myaba yònsò. Ee, nudi bònsò beena Mpenta. Eyo. Nènnwàmbilè cingàakapetà pàmfikilè musangu wà kumpala mu cipaapu cyenu, mu mulongo wènù.

Mvwa nsanganyibwa mu Indiana emu, mu mwaba kampana wùvwàbo bàbiikila ne m'Mishawaka. Cisumbu cya nzànzànzà cya beena Mpenta cimmwènèku kacya, bàvwà bàbàbiikila ne—ne ng'Assemblées Pentecôtistes de Jésus Christ, ngeela meeji, anyi cintu bu nanku awu, musumbà wà bantu balenga bàà dikema. Patùdì twakulangana apa bàkaadi badyènzè bulongolodi ne bàbàbiikila ne m'Pentecôte Unie. Mbatàpùlùke ne bakwabo aba, bwa cilumbu cya bàkòkangana pa dibatiiza dya mu màyi. Aci kacyna cyèna ne biikalè beena lubombo nansha. Kùdi beena Kilisto bashùwashùwàlè bààbùngi, balediibwe cyakabidi ku Nyuma Mwimpè mulelela bashùwashùwàlè munkaci mwabo amu. Ne Nzambi mmubàpèeshe Nyuma Mwimpè pa kubàtijiibwa kwabo kwa mu “Dìnà dya Yesu,” ne mupèeshe bakwabo dibatiiza dya Nyuma Mwimpè, biikalè babàtijiibwe mu “Taatù, Mwànà, Nyuma Mwimpè.” Pa nanku: “Nzambi mmupèeshe Nyuma Mwimpè, aba bàdi bàMutùmikila,” mwaba awu mbanganyi—mbanganyi bàdi bapetè, bàdi baMutùmikile? Ki bwalu mbwòbù abu's.

⁴⁶ Bu nwènù anu mwa kupwaku anu mwoyi, ne aba bàdi baswe kwikala mushindu kampana abu, bàlekèlaayi biikalè nanku, kadi tòngunukàayi nwikalè bàna bàà muntu. Kwajiki. Kanwikadi... Cidi cyènzè, ncya ne mbatàpùlùke, bakòsòlòke. Nwamonu anyi? Cinyi? Cìvwa nditapulukungana, dipandulukangana, ne dikosolola dya bwànà bwetu, dishààlà dya aba pa bule aba pa bule ne dikosolokangana munkaci mwenu. To, mukalenge, katwena bakòsòlòke to, tudi cintu cimwe. Ncya bushuwa.

⁴⁷ Kadi pàmvwà mwimane kuntwaku, mvwa munkaci mwa kutangila bantu abu. Mpindyewu, mèmè, ncipàtukilakù mu ekeleeziya mukese wa ciibidilu wa ba-Bptistes bàà ku Sud, mona's, mvwa mmona bantu abu, mèmè kubwelamu ne biikalè bàtuuta bikashi, bèèla mbila ne: “Umwe wabò, umwe wabò, ndi ne disanka dya kwamba ne ndi umwe wabò!”

⁴⁸ Mèmè kudyàmbidila ne: “Ekelekele! Yoyòyò!” Katanci aka anyi, ki muntu kampana mwònsò amu, wènda ùja maja ne bukole bwèndè bwònsò. “Ka-ka-ka-ka,” mungàakadyàmbidila, “kadi eyi ngenzèlù ya maalu ya mu ekeleeziya's wè! Kacya ncitukù mwanji kuumvwa bintu bya naka to.” Mèmè kutungunuka ne kubàtàngila, eku ne eku. Mèmè kudikonka ne: “Ee, nansha twamba mwine mbwalu kaayi's ne bantu aba?”

⁴⁹ Mpindyewu, nukàadi bangumvwe ndonda bwalu-bulonda bwa nsòmbelu wanyi, pàngàakafikà mu disangisha adi

kuntwaku. Kadi eci ncintu cimwepele cîntù kacya nciyikù mwanji kwamba kwônso aku to, nci tukù mwanji kucyamba to, bantu bitwilângane. Pa nanku bôbò... Mpindyewu, wêwê muswe kucikùpula pa cisanji cyebe cya dikwata naaci mikaba ya mèyi, mona's, udi mwa kwenza nanku. Eyo. Mpindyewu, mwômô amu mêmè kutangila, ki mêmè mpindyewu kudiyàmbidila ne: "Ee, bàba bantu kadi ki bantu bàdi batàmbe kwikala bàà disanka bândi mêmè ewu nciyikù mwanji kumona to kacya bândela." Kabàvwa bàdyùmvwa bundu bwa ntendeleelu wabò to. Twètù ba-Baptistes aba's tutu tuumvwakù anu kaabundu, ku musangu ne ku musangu, nudi bamanye's. Nwamonu anyi? Ne pàkaadibò bàya bwa kusambila, nudi bamanye's, bàyaaya paanyima pàà dikàpàkapà, nudi bamanye's. Nenku—nenku, kadi twètù... Kadi bantu abu kabàvwa nanku to, mwanetu, bàvwa—bàvwa ne ntendeleelu munda mwônso, pambelu pônso, ne pambidi pajimà.

⁵⁰ Ee, ndi mvuluka dilòlò adi dîngàkabàndà pa cibumba cya ku cyambilu adi. Kwambabo ne: "Bambi bônso pa cibumba cya ku cyambilu." Cìvwa mmpungilu. Bìvwa bikèngèla bwa kumwenzelabo muneemu mu Nord, bwa—bwa cilumbù cya disungulujangana dya makòbà, mukenji wa Jim Crow wà ku Sud awu. Pa nanku bônso bààkadisangishila kuntwaku bafùmìne ku myaba yônso. Pa nanku, mvwa musòmbe mwaba awu. Ki kwambaye... Ee, mpindyewu kùdi... Mvwa mutèèlèje bayiishi bônso dituku dijimà adi ne dilòlò adi. Kwambabo ne muiishi kampanda mukulumpe, ùvwa mmukulumpe kampanda wa bafùke wàkapàtuka, mwikàle anu ne nsuki kajengu kakese kanyungùlùke mutu, mushindu *ewu*, muvwàle nkooi munene mulemùle wa bayiishi wa kale wa mukila awu, nudi bamanye's, wa nkoolò wa velour, kadi pààkù kwikàle luuya lukole. Mukwacikwetu mukùlákàjì awu kupatukaye mwaba awu mushindu *ewu*. Kwambaye ne: "Bànà bàanyi bananga," mwàkambàye, "ndi muswe nnwàmbilè," kuditwayè mu difila dya bujaadiki. Mêmè ki uvwa mwambe kwikala mwànà mutekete pa cibumba cya ku cyambilu apu. Ki pashiishe kwambaye ne: "Ndi nzwambila!" Kwangacilaye cyena-bwalu cyèndè mu Yobò ne: "Wêwè uvwa penyì pàMvwà ntèèka bishimikidi bya buloba? Ngambilaaku mwaba wùdibi bikwàcile."

⁵¹ Bayiishi bakwabo bônso aba bàvwa bôbò bàyiisha pa bìdì bitàngilà Kilisto, mu mmwenenu wa ciibidilu. Mvwa mubàtèèlèje, bansànkishe. Kadi kì mmulomyana mukulumpe awu to! Yèyè wàkaalukila kuya mwàmwa mu bidimu bitwè ku binunu dikumi kumpala kwa dyulu ne buloba kubangabi. Kubàndayè mu Maulu ne kutùulukilayè mu maulu, cìvwa cyènzekà aci. Cìvwàbò bôbò bàyiisha, batùngùnùke, mundaamuunya amu; yèyè ùvwa ùyiisha pa bìvwà byènzeka mu Dyulu. Kwalujaye Kilisto pa mwanzankongolo wà ku

ntwàngeeni wa dyulu ne buloba awu, mwaba kampanda mwàmwa mu Cyendelele. Kaa, yèyè kàvwa muyiishe tusunsa tutwè ku tutaanu to mu mushindu wà ne mukulumpe awu, Cintu kampanda kumubakulaci. Kutùpikayè muulu kadi kukùmakajayè bikankanya, ne kwelaye lubila ne: “Éyi’s wè!” Yèyè ùvwa ne mwaba bunene anu bu wúndi mèmè naawu kaaba aka ewu. Kwambaye ne: “Kanwena ne mwaba bunene bukùmbàne bwa mèmè kuyiishilapù to,” ki yèyè uyààya wàwa.

⁵² Ee, mèmè kudyàmbidila ne: “Pìikalà aci mwa kwenza nanku kùdi muntu wa bidimu bìipacila ku makumi mwandamukulu, ncifwànyine kungenza mèmè ewu cinyi? Ki cindi mèmè muswe cyàcya. Ki cindi mèmè muswe cyàcya.”

⁵³ Kadi cyàkampità mèmè ncyôci eci. Mpindyewu, tudi twakula pa bìdi bitàngilà baadémons mpindyewu. Cyàkampità mèmè, ngàkatàngila bantu babidi. Umwe ùvwa musòmbe ku luseke, mukwabo ku lukwabo. Nenku pàvwà Nyuma ùtùuluka, bantu abu bàvwa bènza kujuuka e kwakula mu myakulu ne kwela mbila, ne kushààla ku mishiku kutòòke tòò. Ki mèmè kudyàmbidila ne: “Kaa, ekelekele, ngìkalakù mwa kupeta cya naka’s wè!” Nwamonu anyi? “Bilenga be! Oh, cyàcya’s. . . Ndi munange cyàcya be!” Ee, mèmè kuya mu budimi bwa matalà. Ne nkààdi munùlondèle bwalu-bulonda bwa nsòmbelu wanyì. Nukààdi babùbalè mu mukanda. Mèmè kulààla bufuku bujimà. Nenku mèmè kwalukilamù pàakacyàbu mu dinda, pa nanku mvwa ndyàmbidila ne nèngànji anu kuteeta. Mèmè ntu ne mushindu wà dyanza maalù wùdi muntu nansha umwe kàyikù mumanye to pa kuumusha anu Nzambi ne mèmè. Pa nanku, aci, ndi ngangata lusumwinu ne nya katwilangana ne nyuma wa muntu. Nutu nucimòna pa cibumba cya ku cyambilu apa. Nwamonu anyi? Ki pashiishe mèmè kudìtwa mu diyiikilangana ne umwe wa ku bantu abu. Mvwa mubàmòne, basòmbe batwàngàne nkundù, bàkwatangana ku byanza, bàja maja ne bèèla mbila. Mèmè kudyàmbidila ne: “Kaa, ekelekele, aci’s cidi cimwèka kùndi anu cya dya bushuwa!”

⁵⁴ Ki mèmè kukwata cimwe cya ku byanza byèndè. Mèmè kwamba ne: “Wetwawu, mukalenge!”

⁵⁵ Yèyè ne: “Wetwawu.” Muntu mulenga wa dikema, muntu wa mushindu wà muntu mukàlàngà. Yèyè ne. . .

Mèmè ne: “Wèwè udi mwambi anyi?”

Yèyè ne: “To, mukalenge. Mèmè ndi anu mwena kwitabuuja cyaanàna.”

⁵⁶ Ki mèmè kubwela nendè mu muyiiki bwa ngaamòna mwa kubakula nyuma wendè. Nwamonu anyi? Yèyè kàvwa mumanye aci to. Muntu nansha umwe kàvwa mumanye to. Ncivwakù mwambilangane kantu nansha kamwe pa bwalu abu to. Mpaanyima pàà bidimu, kumpala kwa mèmè kucyàmba. Ki bòbò. . . Kadi pàngààkafikà ku dicijandula, civwà cyùmvwika ne

ncielelela, muntu mupwàngàne anu menemene, mwena Kilisto! Kakùyi mpatà to muntu awu ùvwa munsantu wa Nzambi. Mémè kudyàmbidila ne: “Mwaneetu, mbîmpè.”

⁵⁷ Kadi luseke lwàvu kukemesha ndwà ne, pângààlu kubakula mukwabo muntu awu, kabìvwa bìpetanganakù to. Ùvwa mene musòmbe ne mukaji uvwa kàyi mukàjèndè to. Neya bushuwa. Nenku mémè kumona ciseemena pabwìpì nendè, cikeena-kumona. Mémè kudyàmbidila ne: “Kaa, ekelekele, kabyena mwa kwikala nanku to.” Ki muntu awu... Mémè kudyàmbidila ne: “Mpindyewu, mpindyewu, nyuma udi munkaci mwà bantu bàba ngwa mashimi. Ki cyònsò cidiku ncyòci aci.”

⁵⁸ Nenku dilòòlò adi pàvwà...pàmvwà muye ku disangisha adi, ne mabenesha àlòka, mvwa ndomba Nzambi, ne Nyuma Mwîmpè, Mwanjelo wa Mukalenge ùvwa ùfila bujaadiki ne cìvwa n’Nyuma Mwîmpè. Ne Nyuma umwèumwè uvwa utùùlukila *ewu* muntu awu nguvwa utùùlukila *wàwa* muntu. Nenku pàvwà Nyuma utùùluka, bònsò babidi bàvwa bàjuuka kuulu, ne bònsò babidi bàvwa bèèla mbila mikole ne bàtùmbisha Mukalenge, ne bààkula mu myakulu ne bàja maja. Mémè kwamba ne: “Ncyèna—ncyèna—ncyèna anu mwa kucyùmva to, Mukalenge. Kùdi... Ncyèna mwa kucimòna mu Bible to, mwaba wùdici cifwànyine kwikala cikùmbànàngàne.” Ki mémè kwamba ne: “Pàmwàpa mémè ngudi museeswishiibwe’s.” Nwamonu anyi? Mémè kwamba... Mpindyewu, monaayi, ncyèna—ncyèna mwa... Mémè ntu—mémè ntu mwitabi anu menemene wa mùdi Bible mufùnda. Bikèngela cìikalè Eci. Nwamonu anyi? Mémè kwamba ne: “Mukalenge, Wèwè’s udi mumanye wànyì mushingà, ne bikèngela bwa n—cimònè mu Díyi Dyèbè. Nenku n—ncyèna mwa kuumvwa to. Pàdi Nyuma Mwîmpè utùùlukila *ewu* muntu, Nyuma Mwîmpè utùùlukila *wàwa* muntu, ne umwe wa kùdìbo mwikàle munsantu ne mukwabo mwena lubombo. Ne mémè ndi mumanyè ne mmùdibi.” Ndi mucimanyè. Kakùyi... Mvwa mwa kwikala muye ne muntu awu ku luseke ne mumujaadikileci, anyì mumwelè patòòke mwaba awu mene ne mumwambileci.

⁵⁹ Mùmvwà mufwànyine kwikala mwenzè ne muntu uvwa musòmbe kaaba aka makeelela dilòòlò awu, yèyè’s ùvwa anu mu—mushimakajanganyi wetu ewu, bu kwòkò wa nanku musòmbe mwaba awu. Ne bìvwa bìkèngela bwa mémè kwikala mucyèlè patòòke, kadi ùvwa mufwànyine kwikala mujuukile kuulu mubangè makokyanganyi. Ki mémè kubilekele pàanyì nanku’s, bwa bwalu bwa disangisha adi, kadi mvwa mumanye cìvwaye. Eyowa’s, mukalenge.

Kùvwa muntu umwe, babidi bajimà, basòmbè paanyima pààpa mene, dilòòlò adi, bàà mu ekeleeziya kampanda anu mu cimenga eci mene. Badyudi bàà menemene! Mvwa mubàmòne. Kadi, wèwè mucyènzè, yèyè’s ùdi ùjuula anu ndululu. Nkàadi mucyènzènzè misangu ne misangu. Ntu anu mbàlekela nanku,

nwamonu's. Bìdi anu bîmpè. Nzambi mmumanye, Yèyè ki Mulumbulwishi. Bôbò bàdidingè anu bàmbiikilè musangu kampana, kadi díbà adi nenumone cintu kampana cyènzeka, nudi numona's, mulekelaayi.

Bu mùdi démon, kí mmémè uvwakù mubiikile démon awu bwa kupatukaye to. Yèyè nguvwa mulwe anu kùndi cyanààna mungeele kadyòmbò. Díbà adi ndyàlu Nzambi kubwela mu mudimu, nwamonu's, ncyà bushuwa, ne nwènù's nwákamòna cyàkenzekà aci. Eyo. Kadi mémè ndi anu mbilekela pàànyì nanku awu. Cyàkavwija disangisha adi dikolè, bwalu nyuma awu ùvwa ùbwela ùlwa pàndi díbà dyònsò, nwamonu's. Nenku mémè kutungunuka anu nanku.

⁶⁰ Kadi mpindyewu, bantu aba, ncívwa mwa kucyùmvwakù to. Kadi mpaanyima pàà bidimu bibidi, anyì bisatu, pámvwa nsanganyiibwa ku Green's Mill, mu Indiana, muneemu emu, mu citùpà cya buloba cilamina baasùktùtù. Mvwa nsanganyiibwa mu nyongolo wa kale kùntù nya kasambila aku. Nenku mwómò amu, mvwa ngamba ne: "Mukalenge, ncyèna mwa kuumvwa cidì cyènzèkèle cisumbu cya bantu bàba to. Bantu bàà maalu matàmbe bwîmpè bânkaadìku mutwilàngàne naabo kacya bàndela, kadi ncìyi—ncìyi mwa kuumvwa ne mmunyi mùvwà cyàcya mwa kwikala nyuma mubi to. Pàdibi ne cidì. . . bu ne díbà adi. . . Wèwè udi numanye bululàmè bwa mwoyi wànyì. Udi mumanye mùndi muKunange ne mùndi muKukwàcìle mudimu. Ne Nyuma umwèumwe udi kaaba aka, mwikàle naanyì ewu, ùvwa pa bantu abu. Ne n'Yèyè awu uvwa pa muntu wàwa, kuntu kwaka, bya mwomumwe." Pa nanku ncívwa mufwànyìne kuumvwa to.

⁶¹ Ki Mukalenge kutuulukaYe mu luse Lwèndè ne kundeejaYe. Mwaba wùvwàci ngôwò ewu. Cidi ne cya kwikala cya mu Mifùndù, dyambedi. KwambaYe ne "Ambula Bible webè awu." Pàànyì kwambula Bible wanyì awu. Ngeela meeji ne mwa mushàale mukwate Bible awu munda mwa tusunsa dikumi kakùyi muntu. . . Dìyì dikwabo nansha dimwe kadìyi dílwa to. Mémè kushàala mwindile katanci kakese. Mémè kuMuumvwa wàmba cyakabidi ne: "Buulùlà mu Ebèlù 6 ùbangè kubala." Mémè kwenza nanku. Nenku pààfikici kwinshi aku, kaaba kàdiYe mwambe ne: "Mvula wùdi wùlwa misangu yàbùngì pa buloba bwa kubùmuyamina màyi ne kubùlongolola, bwa kubwàkaja bwa cidìbu. . . kadi mèbà ne mingòngà, bìdi pabwìpì ne kubengiibwa, bìdi ndekeelu wabì nkwoshiibwa." Ki mémè kucibàkwila kaaba aku mene.

Mémè kudyàmbidila ne: "S'ki cyòci aci. Twasakidila kudi Nzambi! S'ki cyòci aci." Nwamonu anyì?

⁶² Mpindyewu, Yesu wàkamba ne: "Mumyaminyi wàkapàtuka wènda ùyamina mamiinu," kí mmwómò anyì? Mpindyewu, nudi bônso beena Kilisto kaaba aka. Bantu bônso bèdì byanza

muulu, bôbò biine, beena Mpenta, beena Kilisto balediibwe cyakabidi. Eyo. Bâdi. . . Nenku Yêyè wâkamba ne: “Mumyaminini wâkapâtuka, wènda ùmyamina mamiinu. Kadi pàvwàye mulààle. . .” Diikisha dyèndè, lufu, pankaci apu. Nwamonu anyi? “Kadi pàvwàye mulààle, mwena lukuna wâkalwa ne wâkamyamina lupèlà mu budimi abu.” Lupèlà ncinyi? Bisoosa bibi, mingòngà ne bikwabo. Mpindyewu: “Kadi mudimi (muyiishi’s) pàakamonàye mingòngà ayi mitoloke, wâkamba ne: ‘Nye nkayijuulè.’ Kwambaye ne: ‘To, to. Neùjuudilèku kabidi ne blé. Bilekèlè byònsò bibidi bikolelè pamwe.’”

⁶³ Kùdi budimi bwa blé kaaba aka. Mùdi bilàmbalambà, nyiny’a cìsòngà, bisoosa bya mupuuya mubi bìdi bitwàngana, ne bikwabo byònsò muntwamu. Neya bushuwa anyi? Kadi, mpindyewu, mwômò amu mùdi blé. Mpindyewu, mvula ùdi ùlwa misangu yàbùngì pa buloba, bwa kubùmyamina màyi. Mpindyewu, mvula ùtu ngwa cinyi? Kì mbwa kumyamina nyiny’a cìsòngà màyi to. Mpindyewu tàngilàayi ne tèyaayi ntema. Kì mbwa kumyamina bilàmbalamba màyi to. Mvula ùdi utùmiibwa bwa blé, kadi Nyiny’a cìsòngà ne bisoosa bibi bìdi ne nyoota anu mùdi blé naayi pèndè amu. Nenku mvula umwèumwè udi umata pa blé awu nyèyè udi umata pa bisoosa bibi. Ne kaacisoosa kakese kabi nekàjuukè kalulàme mushindu ewu, ne disanka ne kàcyònkómoka, anu mùdi kaablé kakese pààkù kàjuuka kòòlòlòka.

⁶⁴ “Kadi ku mamuma àbò nkunwàbàmanyinà.” S’ki bwalu mbwòbù abu. Nwamonu anyi? Mpindyewu, Nyuma Mwimpè umwèumwè awu ùdi mwa kubenasha mwena lubombo. Aci’s ncyelè bamwe bàà ku nwènù ba-Arminiens cibulà cya lufu, kadi’s m’Bulelela. M’Bulelela. Mbanùyiiishè cijila, ne mèmè pàànyì, s’ndi ngiitabuujà cijila. Kadi Nyuma umwèumwè awu, mvula ùdi ùmata pa baakane ne babi, kadi ku mamuma àbò nkunwàbàmanyinà.

⁶⁵ Mèmè mutàngile kaaba aka ne nya bwa kakeba blé, ndi ngangata blé, kadi bisoosa bibi bìdi biswikiibwa byònsò. Ne bìdi ne mwoyi ku mvula umwèumwè udi mumate bwa blé awu. Kadi mvula kàwva mutumiibwe bwa bisoosa bibi to, ùvwa mutumiibwe bwa Blé. Kadi bu mùdi mvula ùsanganyiiibwa mu budimi, blé ùsanganyiiibwa. . .bisoosa bibi bisanganyiiibwa mu budimi bwa blé, bìdi bituucila dyàkalenga ku mvula aku anu dya mwomumwe ne didi bikwabo abi bituutè. Ne mvula umwèumwè udi mwenze bwa blé ìkalè ne mwoyi awu, ngudi mwenze bwa bisoosa bibi kwikalabi ne mwoyi.

⁶⁶ Bintu byònsò mu bufùki bìdi cifwanyikijilu cya bya nyuma, mutùtù tulongesha. Ki cyòci aci, dilonga dya maalu a baadémons, démons yìtentula bwena Kilisto, nansha nanku, yìpeta mabenasha. Aci kì ncipeepèle to, bânà beetu, bu nwènù mwa kucyàngata. Nwamonu anyi? Nwamonu anyi? Mpindyewu, m—m’Bulelela.

⁶⁷ Nenku, mêmè ncyèna musungidiibwe leelu ewu ne bwalu ndi mwele mbila nansha. Ncyèna musungidiibwe ne bwalu ndi ndyùmvwu bu musungidiibwe to. Ndi musungidiibwe bwalu ndi mukumbaje mishingà ya Nzambi ya Bible ewu. Yesu mmwambe ne: “Ewu udi utèeleja Mèyi Àanyi ne wítabuujá Yèyè udi muNtume, ùdi ne Mwoyi wà kashidi, ne kàakupícila ku cilumbulwidi nansha, kadi mmuumuke ku lufu muye ku Mwoyi.” Mémè ndi ngiitabuujá nanku. Ncya bushuwa. Ne ku mishingà ayi nkùndi musungidiibwe, bwalu ki mùdi Nzambi mwambe.

⁶⁸ Yèyè mungambile ne wèwè udi musungidiibwe bwalu muntu kampanda mmwambe ne: “Cipeepele cikole cya civuma ncintuute mumpala,” abi’s mbilenga byenze ne mulòwu, kadi ndi muswe kumanya ne aci cipeepele cikole cya civuma ncifùmìne penyì kumpala kwa kuntuutaci mumpala, nwamonu’s. Mpindyewu, nnsòmbelu wa mushindu kaayi uwikalà nendè paanyima pàà cipeepele cikole cya civuma aci cikutuutè? Nwamonu anyi? Nwamonu’s, ku mamuma ebe nkùdi umanyikila. Pa nanku, démons yidi mwa kukwacila mudimu munkaci mwa beena Kilisto. Nudi nwitabuujá nanku anyi? Tàngilàayi Pòlò, Pòlò mmwambe. . .

⁶⁹ Mpindyewu ki mwaba ngwòwò ewu wùdi beena Dituku dya Mvula Mishìishe. . . Kwòkò umwe wa ku nwènù kaaba aka, wàmfwilakù luse mêmè ngamba cintu cikulwisha. Ncyèna mufwànyine kwamba cintu cikulwisha citàmbe mùndi mwa kucyàmba bwa beena Asamblées, anyi nì nganyi, ba-Baptistes, anyi nì nganyi mukwabo to. M’Bulelela bùdi Bulelela. Mwaba wunùdi bapàmbùkile, wùvwu ngwòwò ewu: nudi nuvwija bantu abu baprofeta ne bakwabo bàdi kabàyi baprofeta to. Baprofeta kì “mbabàtèntèkèle byanza” kadi kubàtùma to. Baprofeta mbalela nanku. Nwamonu anyi? Mu Bible, kùdi *dipà* dya ciprofeta. Ki mwaba wunùdi batupakeene ngwòwò awu, pankaci pàà dipa dya ciprofeta ne muprofeta. Dipà. . .

⁷⁰ “Nzambi, mu bikondo bya kale ne mishindu mishìilèshìilàngàne ùvwu mwakwile ne baataatù kùdi baprofeta, mu matuku a ndekeelu aa kùdi Mwan’Èndè, Kilisto Yesu.” Ne Mubidi wà Kilisto wùdi ne mapà citeema a Nyuma àkwacilamù mudimu. Ne dyòdi ndifwànyine kwikala pa mukaji *ewu* dilòlò edì, ciprofeta, kadiyikù mwa kumulwilakù kabidi to matuku èndè ònsò a mwoyi. Didi mwa kulwa pa muntu mukaji *ewu* dilòlò didi dilondà. Didi mwa kulwa pa muntu mulume *ewu* musangu wùdi wùlondà. Didi mwa kulwa pa udi paanyima pààpa *wàwa*, musangu wùdi wùlondà. Aci kacyna civwija mukaji awu muprofeta to, kacyna civwija muntu nansha umwe muprofeta to. Ndi pà dya ciprofeta munda mwebe.

⁷¹ Ne kumpala kwa muntu mulume awu anyi ciprofeta aci kufidiibwaci mu ekeleeziya, bikèngela cìjinguludiibwè kumpala kwa bajinguludi bàà nyuma babidi anyi basatu. Ncya bushuwa anyi? Bilondèshile, mpindyewu, Pòlò mmwambe ne: “Nwènù

bônsò nudi mwa kwamba biprofeta, ku umwè ku umwè.” Cintu kampana bôbò bacibuulwile ewu nunku, wawa naka àpuwè. Ee, aci dîbà adi’s ncifwànyine kuvwija musumbà mujimà awu baprofeta, bilondèshile dilongesha dya leelu edi. To, nwènù ekeleeziya wa Mpenta, tudi babwejàkàjàngàne bintu. Nenku ki bwa cinyi Nzambi kèna mwa kulwamù to, too ne patwikalà baakàje cintu aci bacitèèkèle pa Bible. Ncya bushuwa. Bikèngela nupete kajila kàà cya bushuwa. Mmuniyì muwibakà nzubu kùyi mutàpe dîsù ku dizòla? Nwamonu anyi? Bidi bikèngela ùbangè mu mushindu mujaalàme.

⁷² Mpindyewu, mwômò amu, muprofeta, kacya kanùtukù banji kumona muntu mwimane kumpala kwa Yeshàayi, Mòsà to. Kùdi umwe wàkiimana nanku, Koolà, dituku kampana, ne kuteetaye bwa kukokangana nendè, kadi Nzambi kwambaYe ne: “Tàpulukà, Mèmè nèmbuululè mukana mwa buloba ne...” Muprofeta mmulela nanku. “Mapà ne mabiikila...-kabiyi bya dinyingalala to.” Aci ndidyànjila-kulongolola dya Nzambi, kubangila anu pàcidiye mwànà wa mu diboko kubànda. Byònsò bìvwa bijaalàme anu menemene, anu menemene cìvwàye wamba ncìvwà mbulelela ne cishindikìibwe ne cileejìibwe patòoke. Cìdi Dìyi dya Nzambi, dìdi dilwa kùdi muprofeta. Kadi dipà dya ciprofeta didi dyòdi mu ekeleeziya.

⁷³ Mpindyewu wèwè udi wamba ne: “Ee, baprofeta’s mmu Dipungila Dikulukulu.” Kaa, to! Dipungila Dipyadipya’s dìvwa ne baprofeta.

⁷⁴ Agàbò’s ùvwa—ùvwa muprofeta wa Dipungila Dipyadipya. Tàngilàayi Nyuma wa ciprofeta mwàkatùulukàye kuntwaku wàmbila Pòlò bwalu abu. Pashiishe ki Agàbò udi ufùmina ku Yelusalema ewu, ùsangana Pòlò, ne ùdìswika mukaba wènde, ne ùkùdimuka wamba ne: “EMU MMÙDÌ MUKALENGE WÀMBA, muntu uvwa muvwale eci awu neàswikiibwè mu nkanu pààfikàye ku Yelusàlèma.” Agàbò, yèyè wàkiimana ne kwamba awu, wàkadyànjila kwamba cìvwà mwa kwenzeka, yèyè ùvwa muprofeta, kàyi muntu ne dipà dya ciprofeta to.

⁷⁵ Ne dipà dya dyondopa ne mapà ònsò awu, wèwè mulunda wanyì mwena Mpenta, nwènù mbàdi babibwejàkàje. Mapà àdi mu ekeleeziya, àdi bwa bantu kanà bônsò mu ekeleeziya, muntu yònsò udi mubàtìjìibwe mu Mubidi awu. “Ku Nyuma umwe nkutùdi bônsò babàtìjìibwemù.” Ne Bible mmwambe. . .

“Ee, mèmè ndi ne dipà dya dyondopa.”

⁷⁶ Ee, Bible mmwambe ne: “Tondelanganaayi bilema byenu muntu ne mukwèndè, ne sambidilanganaayi muntu ne mukwèndè.” Muntu yònsò àsambidilè mukwèndè. Katwena cisumbu cikòsòlòke nansha; tudi cisumbu mu ciibùngi, basanga pamwe. Nwamonu anyi?

Mpindyewu, mushindu awu ngùdi misangu mikwabo démons yìkwàta mudimu.

⁷⁷ Mpindyewu tàngilàayi cìdì Pòlò mwambe: “Umwe yéyè mwakule mu myakulu ne mukwabo wàndamuna, ne cyònsò cìdìye mwambe aci, cyànji cìjinguludiibwè dyambedi kumpala kwa ekeleeziya kuciitabayè.”

⁷⁸ Mpindyewu, kacýàkwikala dyambulula dya Mufùndu, anyi cintu bu nanku nansha. Nzambi kàtu wàmba ùDyàmbulula to. Kadi neciikalè didimwija dya bàdimwija ekeleeziya. Pashiishe bajinguludi bìmpè bóbò bambe ne: “Túcýàngàtaayi.” Eyo, civwa cya kùdì Mukalenge. Mwibìdì wàmba ne: “Túcýàngàtaayi.” “Mukana mwa bantemu babidi anyi basatu, dîyi dyònsò dijaadikiibwè.” Dìbà adi ekeleeziya àcyàngàtè ne àye kadilongolola bwa cyòci aci. Cyòci kacìyi cyenzèke to, cìdici cyambè aci, dìbà adi nudi ne nyuma mubi munkaci mwenu. Ncya bushuwa. Kadi cyòci cyenzèke bulelela, dìbà adi elàayi Nzambi twasakidila, Nyuma wa Nzambi ùdì munkaci mwenu. Nwamonu anyi? Mpindyewu, ki mwaba wunùdì ne cya kutapa ntaala kudimuka ngwòwò awu. Pa nanku, kanukebi bwa kusaka maalu ku bukole to. Mémè ncyèna mufwànyine kudipèèsha mémè mwine mèsù mafiikuluke pàdìbi ne ndi ne a bleu to, nwamonu’s, bìdì bikèngela ngiikalè ne disanka bwa mèsù àànyì a bleu awu. Mpindyewu, ki mwaba ngwòwò awu wùdì démons yikwàcila mudimu mu cipaapu cya bantu bàà nyuma.

⁷⁹ Mpindyewu tudi ne cintu kampanda cya ndòndò munkaci mwa kulwa kaaba aka, ne ndi ntekemena ne kí ncitàmbeàmbe kwikala cya ndòndò to. Mpindyewu mu Samwèlè wa Kumpala 28, ndi muswe kubala Mufùndù kampanda kaaba aka pa dìbà edi mene. Ndi muswe bwa nuteeleje ne ntema. Ne ndi muswe kutwala bwalu bwa “démons,” kunuleeja mùdìyi yikwàta mudimu anu mu ekeleeziya mene, ne mùdì Sàtaanà mwikàle ne ditentula dya cyònsò cya cilelela cìdiku aci. Mpindyewu nudi mwa kumona ne, bilondèshile Bible, démons yìdì yilwa munkaci mwa beena Kilisto ne yibàtentula.

⁸⁰ Ne misangu yàbùngì tukàadi bambe bantu ne mbeena Kilisto pàtùbo bàmba ne: “Ndi ngiitabuuja Yesu Kilisto.” Mona’s, démons yìtu yìtabuuja cintu cimwecimwe aci, ne bàzakala. Aci kí ncimanyinu cya ne udi musungidiibwe nansha. Dimwe dya ku malòlò aa ndi muswe kubwela mu disungudiibwa, ne dìbà adi nenumone cìdì lupandu lùumvwija. Nwamonu anyi? Kwèna ne bwalu nansha bumwe bwa dycznamù to, nì nku ntwadijilu, nì nku ndekeelu, anyi nì ncinyì cyùdì mwa kwenza pa bwalu abu. Nzambi ùdì ùsùngila muntu, kakùyì mushìngà mwenza to. Balumyana, aci’s ncipweke too ne mu ndòndò, kí mmwòmò anyi? Mpindyewu, abi’s mbipiciibwe ne bacyùmùshè mu nwènu’s, patùdì pa cyena-bwalu ciine apa. Eyo.

⁸¹ Abraham nguvwa ntwadijilu wa diitabuuja dyetu. Ncya bushuwa anyi? Kaa, Abraham’s ùvwa ne mulayi. Nenku Nzambi wàkabiikila Abraham bwalu ùvwa muntu munene, ngeela meeji? To, mukalenge. Ùvwa mufumine ku Baabùlònà, mu—mu buloba

bwa Kaasàdà, mu cimenga cya Ulà, ne Nzambi kumubiikilaYe ne kwenzaYe nendè cipungidi Cyèndè, kakùyi mushingà mwenza to. “Mémè nênkusungilè. Ne kí ng’anu wêwè to, Abraham, kadi Dimiinu dyebe,” kakùyi mushingà mwenza to.

⁸² Nzambi mmwenze cipungidi ne muntu, ne muntu ùdi ùshipa cipungidi cyèndè aci dîbà dyònsò; kacypù muntu kàtukù mulame cipungidi cyèndè ne Nzambi to (Kacya mikenji kayààkalamiibwakù to; kabàvwakù mwa kulama mikenji to; Kilisto wàkalwa ne wàkashipa mikenji, Yèyè mwine.) bwalu ngàsà ùkaavwa mumane kulongolola Musungidi. Mòsà, mulongolola n̄jila wa dipàndukila, ne pashiishe, dipanduka’s wè, kadi pashiishe bantu, paanyima pàà cyôci aci, bàcìvwa anu baswe cintu kampanda cya kwenza. Muntu ùdi misangu yònsò anu ùditàcisha bwa kwenza cintu kampanda bwa kudìsungila yèyè mwine, pèbè kùyi mwa kucyènzakù to. Ki mwèndè mùdiye. Mmwenze anu ùjandula ne ùvwa butaka, mu budimi bwa Edènà, kwenzaye mbondya ya mabeji a mfigi. Ncya bushuwa anyi? Kadi kusanganaye ne kabìvwa bifwànyine kukumbana to. Kakwena cintu nansha cimwe cìdi muntu mwa kwenza bwa kumusungilaye yèyè mwine to. Nzambi ngudi ukusungila, kakùyi mushingà mwenza to, mu bikondo byònsò. Ne dîbà adi paùdi musungidiibwe, udi musungidiibwe.

⁸³ Tàngilàayi Abraham. Kùvwà muntu awu aku, kwàkayàye aku, kadi Nzambi wàkamupèsha buloba bwa Pàlèstinà ne wàkamwambila bwa kùùmukumù to. Mwena Yuda yònsò uvwa umuka mu Pàlèstinà ùvwa mutwè cìmpingà. Nzambi wàkamwambila bwa kushààlaye mwòmò amu. Nzambi Yèyè mukwambile bwa kwenza cintu kampanda, kadi kùyi ucyènza to, dîbà adi udi mutwè cìmpingà. Ncya bushuwa anyi? Eyo, ki mushipu kulwawu, bwa kuteeta diitabuuja dya Abraham. Kadi Abraham pamutu pàà kushààlaye muntwamu, to, kàvwa mwa kushààlamù to, kunyeemaye, kwangataye Sarah e kuyaye mu ntanta wa kilòmèètà nkama yinaayi ne makumi mwandakulu (ngìkalapù ne dîbà dya kukafika ku cyôci aci’s wè) too ne ku buloba bukwabo.

⁸⁴ Ne pààkafikàye kuntwaku, dîbà adi kusanganaye mfumu munene ewu kuntwaku, Abimèlèkà. Ùvwa nsongàalùmè wa citende ne mwikàle ùkèba mukaji wa mananga, ki kusanganaye mukaji wa Abraham, Sarah, nenku kukwacikaye dinanga bwèndè yèyè. Ki Abraham kwambaye ne: “Mpindyewu, ùmwambilè ne wêwè udi mwaneetu wa bakaji ne mémè ndi mwaneenu wa balume.”

⁸⁵ Ki aci kusànkishaci Abimèlèkà, ki kwambaye ne: “Eyo, netùye anu nendè ku nzubu wa bukalenge.” Ne mémè ndi ngeela meeji ne bakaji bààkamulongolola, ne yèyè ùvwa ne cya kumusela dituku divwà dilondà.

⁸⁶ Kadi Abimèlèkà ùvwa muntu mwîmpè, muntu mwakane. Nenku bufuku abu, pàvwàye muye mu tulù, Mukalenge kumumwenekelaYe ne kwambaYe ne: “Wèwè udi anu bu muntu mumane kufwa.” Yèyè ne: “Muntu awu. . .Mukaji ûdi nendè kuntwaku bwa wèwè kusela awu, mmukaj’a bendè.” Mpindyewu tàngilààyaaku: “Mukaj’a bendè.”

⁸⁷ Mona’s, kwambaye ne: “Mukalenge, Wèwè’s udi mumanye bululàmè bwa mwoyi wànyì,” muntu mwakane, wa cijila. “Wèwè’s udi mumanye bululàmè bwa mwoyi wànyì. Muntu awu’s mmungambile ne ‘mmwanààbò wa bakaji.’ Ne mukaji awu, yèyè mwine, kí mmungambilekù ne ‘mmwaneetu wa balume’ anyi?”

⁸⁸ KwambaYe, Nzambi kwambaYe ne: “Mvwa mumanye bululàmè bwa mwoyi wèbè, kí bwa cinyi Ndi mukupangishe bwa kuNgenzela mpekaatu. Kadi yèyè awu mmuprofeta Wanyi!” Aleluuyah!

⁸⁹ Yèyè ùvwa mwenze cinyi? Mutwè cìmpìngà, ne kenji kàà maalu makonyangale, keena mashimi. Ncya bushuwa anyi? Kaa, to, kakùtukù tuumashimi tukese tutòoke nansha. Anyi mmashimi mafike fitùtù anyi kí mmashimi to nansha kakese. Mulumyana musòmbe mwaba awu munkaci mwa kwamba mashimi a buludì, wàmba ne “mmwanààbò wa bakaji” kadi pèndè mwikàle mukàjèndè, údyàngana mukana, pèndè mutwè cìmpìngà.

⁹⁰ Kadi ki muntu mwakane nyèyè awu mwimane kumpala kwa Nzambi, wàmba ne: “Mukalenge, Wèwè’s udi mumanye mwoyi wànyì.”

⁹¹ “Kadi Ncyàkutèèlejakù disambila dyebe to, Abimèlèkà, kadi mwaluje. . .aluja mukaji awu ne mulume awu àkusambidilè. Yèyè mmuprofeta Wanyi; Nèmmutèèlèjè yèyè.” Eyowa’s, muntu mutwe cìmpìngà, mwena mashimi, kadi: “Mmuprofeta Wanyi.” Aci m’Bulelela anyi? Aci’s m’Bible.

⁹² Mpindyewu, apa kanùtàmbi kuya kule ku luseke lwà ba-Calvinistes lwà ne: “Paùkaadi mwinshi mwa ngàsà, ukàadi misangu yònsò anu mwinshi mwa ngàsà” alu to, bwalu nenùkabwelè mu dipanga dya ngàsà. Nwamonu anyi? Mpindyewu, anjì indilaaayi kakese, netùpetè cikondo mu lumingu elu cya kutwala cyòci aci bwa kunuleeja mùdici cijaalàme. Kadi kwèdikù meeji ne bwalu udi mwenze cintu kampanda cibì nanku kwebe nkujikè bwa kashidi to. Wèwè udi mwànà wa Nzambi, udi mulela ku Nyuma wa Nzambi, nudi bânà bàà balume ne bàà bakaji bàà Nzambi, ne mamuma neàdifidilè ôwò miine bujaadiki. Ki bwalu mbwòbù abu’s.

⁹³ Mpindyewu, kí twètù aba, basòmbèle mu buloba abu. Mpindyewu, ndi muswe kubala apa, mvensa mwi6.

*Nenku Shawùlà pààkakonkàye MUKALENGÈ,
MUKALENGÈ kààkamwandamunakù, nì nku ciloota, nì
nku Ulimà, nì nkùdì muprofeta to.*

Nenku *dibà adi Shawùlà wàkambila basadidi bèndè ne, Nkèbèlaayikù mukaji udi ne nyuma wa lubùkù lwà mùzàngù, bwa nye kùdiye, ne nkonkeshe kùdiye.*

Ndi mufwànyinekù kutuutakù bikole pa cintu kampanda mwaba ewu mene, anu bwa... “Nkèbèlaayikù mukaji udi ne nyuma wa lubùkù lwà mùzàngù.”

...*Ki musadidi wendè kumwambilaye ne: Mona, nyewu kùdi mukaji kampanda udi ne nyuma wa lubùkù lwà mùzàngù mu Ènè-Dò.*

Nenku Shawùlà wàkadyàlula, ne wàkavwàla civwàlù, biwàlù bikwabo, ne wàkaya, babidi. . . ne bantu babidi biikàle nendè, ne bààkalwa kwa mukaji awu bufuku; ne bôbò kwamba ne: Ndi nkulomba, . . .-ntempèlàku ku nyuma webè wa lubùkù lwà mùzàngù awu. . . ùmpàtwilèku ùngààkutèèlelà dìnà awu.

Kadi mukaji awu wàkamwambila ne: Mona, wèwè's udi mumanye cidi Shawùlà mwenze, mmumanye bîmpè, yèyè mmuumushe bônso bàdi ne nyuma wa lubùkù lwà mùzàngù, ne. . . bampàkààmàngà, mu ditunga; bwa cinyi. . . wèwè udi untèekela buteyi bwa mwoyi wànyì, ne bwa wèwè kunshebeesha?

Ki Shawùlà kwandamunaye, yèyè kudicipa kùdiye mu dìnà dya MUKALENGE, wàmba ne: Bu mùdi MUKALENGE ne mwoyi, kakwàkukulwilakù dinyooka nansha dimwe to. . .

Dibà adi mukaji awu kwambaye ne: Nkupàtwilè. . . nganyì? Ki yèyè kwamba ne: Mpàtwilè Samwèlè.

Kadi mukaji awu mmwenze anu ùmòna Samwèlè, kwelaye lubila lukole; ki mukaji awu kwakulaye ne Shawùlà, wàmba ne: Udi mundinge bwa cinyi? bwalu wèwè udi Shawùlà.

Ki mfumu kumwambilaye ne: Kùcìinyi nansha; kadi cyùdi umona ncinyi? Ki mukaji awu kwambaye Ndi. . . kwambilaye Shawùlà ne: Ngàmònu nzambi yènda yìbànda yipàtuka mu buloba.

Ki yèyè kumwambila ne: Mmwenekelu kaayi uvwaye nendè? Ki mukaji awu kwambaye ne: Muntu mukulakaji ngudi ubànda, ne mmudibwikile cikòwelu. Ki Sam-. . . (Aci ncikòwelu cya muprofeta awu, mu bushuwa bwa bwalu. Nwamonu anyi?). . . kujingululaye ne ùwva n'Samwèlè; nenku yèyè kwimana ne. . . ne mpala mutwe panshi, ne kuponaye mikookwela.

Nenku Samwèlè wàkambila Shawùlà ne: Wànyangidi ditalala dyànyì bwa cinyi, ne kumpàtula? Ki Shawùlà kwandamunaye, ne kwambaye ne: Ndi mupete dikenga dikole; bwalu beena Pelèshètè mbangenze mvita, ne

Nzambi mmundekele, ne kâna ùngandamuna to, nî nkùdì muprofeta, nî nku ciloota; ki bwa cinyi ndi. . . mukubiikile, bwa wêwè wamònakû mwa kungambila cîndi ne cya kwenza.

Ki dîbâ adi Samwèlè kwambaye ne: Bwa cinyi. . . bûdì unkonkela. . . mêmè, pààbì nyawu MUKALENGE mukulekele, ne—ne mulwe mwena lukuna webè?

Ne MUKALENGE wàmwenzèdì, mùvwàye mungambile, bwalu MUKALENGE wányèngi bukalenge bwèndè mu cyanza cyebe ne wábùpèèshi mene ne. . . Davidì;

⁹⁴ Mpindyewu, bààbûngì bàà kunùdì, mbamanye cyôci eci. Mpindyewu tudi baswe kubwelamù buludi, nenku Nzambi àtùkwàcishèku mpindyewu, bwa katanci, bwa kubwela mu cyôci eci. Mpindyewu tàngilàayi. Kùvwa muntu, Shawùlà, uvwa musangu kampanda mwangàciibwe bu muprofeta, bwalu wàkamba ciprofeta pamwe ne baprofeta. Ncya bushuwa anyi, nwênù balongeshi? Mpindyewu, apa muntu awu ùvwa mutwè cìmpìngà. Ncya bushuwa anyi? Kadì vùlukàayi mwaba wàkamà Samwèlè ne yèyè neikalè, pamwe nendè, mu dituku divwà dilondà. Muye dîbà kadiyi dyanji kukumbana, nwamonu's. Eyo, wêwè kùyi ucyùka Nzambi to, Nzambi neàkuumushè pa buloba.

⁹⁵ Tàngilàayi mu mukanda wà beena Kolinto amu, mùvwà Pòlò mutèeke bantu abu mu bulongàme. Mmwambe ne: “Dyambedi, ndi ngeela Nzambi twasakidila bwenu nwênù, mùdiku kakùyi bintu bya mushindu awu munkaci mwenu, ne bikwabo, ne mùdìbi ne—ne kanwena bapangile dipa dya Nyuma nansha dimwe.” Ùbàmbila cìvwàbo, bilondèshile myaba, mu Kilisto. Pashiishe kubangaye kubàtwa bikonyi, ùbàmbila bwa bayiishi bààbò bakaji abu, ne mùvwàbo bènza, ne mushindu wùvwàbo bàdya ku mèèsà a Mukalenge.

Ne muntu mukwabo mene musòmbè ne mukaji wa tatwèndè, ne wàmba bwa mwine muntu uvwa munda mwa Kilisto ewu ne: “Mwelèlàayi dyabulu, bwa dibutudiibwa dya mubidi, bwa musuuka wàmòna mwa kusungidiibwa.” Nwamonu's, ki cyôci aci's, kumwelela dyabulu. Bible mmwambe ne: “Bwa bwalu abu bààbûngì bàdì ne mabeedi ne matekete munkaci mwenu, ne bààbûngì mbalàale tulù,” baye dîbà kadiyi dyanji kukumbana to bwa mpekaatu. Nzambi mukuumushe mu njila; cimanyinu cìmpè cya ne wêwè uvwa mwena Kilisto, wêwè mwangàciibwe.

⁹⁶ Pa nanku, monaayaaku mpindyewu mwômò emu, Shawùlà wàkangaciibwa bu umwe wa ku baprofeta, anyi munkaci mwa baprofeta, bwalu wàkamba ciprofeta. Nenku mpindyewu yèyè ùvwa mutwe cìmpìngà, bwalu wàkashikukila Nzambi, ne bukalenge bwèndè bààkamunyèngabù mu byanza byèndè ne bwàkatèekiibwa mu cyanza cya Davidì, uvwa Nzambi mwelèle maanyi kùdì Samwèlè, ne kàsù kàà maanyi.

⁹⁷ Monaayi, musangu awu, kùvwa mishindu yisatu yìvwàbo naayi ya dijandwila naayi bintu kùdi Nzambi; wà kumpala wùvwa—wùvwa mmuprofeta, mwibìdi wùvwa nciloota, ne mwisàtù wùvwa ng’Ulimà-Tuumimà. Nenku kayààkandamuna to. Mpindyewu, nudi bamanye cìdi muprofeta, nudi bamanye cìdi ciloota cya nyuma, ne nudi bamanye cìvwa Ulimà-Tuumimà. Nudi bamanye’s, dituku adi mêmè kukonka muntu kampanda—kampanda cìvwa Ulimà, kadi muntu awu kàyi mwa kungumbila ne cìvwa ncikampanda to, Ulimà-Tuumimà. Mu bushuwa bwa bwalu, Nzambi nguvwa wandamwina ku byôbi ebi. Nwamonu anyi?

⁹⁸ Kadi dyabulu ùdi wènza ditentula dya cyônso cya ku byôbi abi; mpàkààmàngà, muprofeta wa mashimi, ne mwena lubùkù lwà lumwenu. Nwamonu anyi?

Mpindyewu, Ulimà Tuumimà ùvwa mulembeleja pa cyâdi cya Aalônà, *apa*, ne Ulimà Tuumimà ùvwa mubwikile mabwe ônsò awu. Ne bàvwa bamulembèlèje mu ntempelu. Nenku pàvwàbo kabàyi batwìshìibwe to, bàvwa bàya kumpala kwa Nzambi, bwa dyandamuna, ne bukênkè kampanda bùvwa bùpenya pa Ulimà Tuumimà apu, bwa ne, cìvwa ndiswa dya Nzambi, anyi kadìvwa dyôdi. Mpindyewu, pàvwà Ulimà Tuumimà kàyi wàndamuna to...Mpindyewu, aci cìvwa dyandamuna dya buludi dya kùdi Nzambi.

Mpindyewu, Ulimà Tuumimà wa leelu ewu; mwena lubùkù mmwangate lumwenu lwà dibùlùngù, bwa kutentula Cyôci aci; cintu cya mafi. Nzambi ùdi mu busatu; makole a Nzambi àdi mu busatu. Ne dyabulu ùdi mu busatu, ne makole èndè àdi mu busatu. Ne mêmè ndi mwa kucijaadika ne Bible. Nenku Ulimà Tuumimà awu, aci...cìvwa anu lumwenu lwà dibùlùngù lùdi dyabulu ùkwàta naalu mudimu leelu ewu elu. Ne muprofeta wa mashimi wa kuneeku leelu ewu, utùdi nendè mpindyewu ewu, ùvwa, anyi, mwamùlopò, anyi mwena lubùkù, kwàka, ùvwa mwangate kaaba kàa muprofeta, ku luseke lwà dyabulu. Nudi bumvwe cìndi muswe kwamba aci anyi?

⁹⁹ Mpindyewu, dìbà adi, Ulimà Tuumimà leelu ewu m’Bible ewu. Muntu yèyè mufile ciprofeta anyi ciloota kampanda, kadi kaciyi cikùmbanangana anyi cyàmbulula Bible wa Nzambi to, ncyà mafi. Kanùcìtàbùùjiku to.

¹⁰⁰ Muntu kampanda ùvwa mulwe kùndi abidi àdi panshi aa, wa ku Inde, kùndi nkeba kuya aku, muyiishi mutekete mulenga. Kwambaye ne: “Mwaneetu Branham, ndi mulwe muneemu emu.” Yèyè ne: “Mukaji kampanda ùvwa ne Nyuma Mwîmpè, nenku,” yèyè ne, “ùvwa anu mukaji mutàmbe kwikala wa kalolo, mutàmbe kwikala wa maalu mîmpè.” Yèyè ne: “Kadi ùkaavwa musediibwe misangu yinaayi, ne mwikàle musòmbe ne bàyèndè mwinâyì awu. Nenku mêmè kwamba ne: ‘Ee, aci ncifwànyineku kwenzeka munyi’s, Mukalenge?’” Ki yèyè

ne: “Mémè kuya kùdiYe e kwamba ne: ‘Kaa, butumbi kùdi Nzambi’s wè!’ Mémè ne: ‘Aleluuyah! Mukalenge àtumbè!’” Anu wa mushindu awu awu, nudi bamanye’s. “Mémè kwamba ne: ‘Aleluuyah! Mukalenge àtumbè!’” Yèyè ne: “Mukalenge kungambilaYe ne: ‘Mona, Nènkupèèshè ciloota.’” Ki yèyè ne: “Mémè kuloota mukàjàànyì, mmumona musòmbe mu masandi. Nenku kwalukilaye kùndi e kwambaye ne: ‘Kaa, udi mwa kumfwilakù luse anyì, Victor? Udi mwa kumfwilakù luse anyì? Mémè ncìvwa...’ ‘Mona’s,’ mûngààkambà, ‘bushuwa’s, nènkuwilè luse nkwalùjùlùlè.’” Yèyè ne: “Mpindyewu, ki cìndi mwenze ncyôci aci.” Yèyè ne: “Wamonu’s, mémè ntu mfwilangana luse.”

¹⁰¹ Mémè kwamba ne: “Victor, ciloota cyebe aci cìvwa cilenga cya dikema, kadi dyabulu ngudi mukupèèsheci.”

Yèyè ne: “Bwa cinyi?”

¹⁰² Mémè ne: “Kacyena cikùmbanangana ne Dìyì dya Nzambi to. Yèyè mmusòmbe mu masandi. Kakùyi mpatà to. Kèna mwa kusòmbe ne balume banaayi nansha. Cya bushuwa. Yèyè muumuke kùdi awu kadi kwalukila kùdi wendè wa kumpala awu, wăbiipi kutâmba ne mùvwàye ku mbangilu amu. Bikèngela àshaalè mujikè, matuku èndè ònsò a mwoyi adi mamushààdile.” Mémè ne: “S’udi mumanye ne aci kacyena cikùmbanangana ne Dìyì dya Nzambi. Pa nanku yèyè. . . Ciloota cyebe aci cìvwa cya mafi.” Mémè ne: “Kacyàkukùmbanangana ne Eci to.”

¹⁰³ Nenku pàvwà muprofeta ùfila ciprofeta, ne bòbò bààkula, ne bàswa kumona ciprofeta aci ní cìvwa cilelela, bàvwa bàcìtèèka kumpala kwa Ulimà Tuumimà. Nenku pàvwà Dìyì dya mukana dya Nzambi ditùma makènkè pa Ulimà Tuumimà apu, dîbà adi kakùyi mpatà to, cìvwa Bulelela. Ne muntu yèyè mufile dyandamuna, mufile ciloota, mufile cintu kampanda cya mu Bible, nenku, anyì ní ncinyì, kadi kaciyi cikùmbanangana ne Bible wa Nzambi to, ncyà mafi. Ki Ulimà Tuumimà leelu ewu nyèyè awu. Pàdi Dìyì dya Nzambi dyàkula, ki Dìyì dya mukana dya buludi dya Nzambi, mùvwà Ulimà Tuumimà kumpala kwa Bible kufùndiibwaYè. Amen! Aleluuyah! Ngùmvù ne butendeledi bwàmbwedi mpindyewu mene. Kanùngàngàci bu mukoleshi wa maalu to, panwìkalà nungangata nanku. Mémè ndi mumanye, ndi mumanye mwaba wùndi. Ncyèna musaluke to. Ncyà bushuwa.

¹⁰⁴ Bulelela ki bwòbù ebu, Dìyì dya Nzambi! Ciloota cyùdi muloote nansha cyôci cya mushindu kaayi, anyì ciprofeta cyùdi mufile nansha cyôci cya mushindu kaayi, cyôci kaciyi Dìyì dya Nzambi to, ncyà mashimi, cyôci kaciyi cikùmbanangana ne Dìyì adi. Ki lutatu lùdìku leelu ndwòlò alu. Ewu ùdi ne ciloota, ewu ùdi ne cikeena-kumona, ewu ùdi ne dyakula dya mu myakulu, ewu ùdi ne dibuulula; mbibwejàkàjàngàne cintu cyònsò nkòong ne bikwabo byònsò, nudi ne mangumba ne

batàpùlùkàngàne ne bikwabo byònsò. Bivwa bikèngela nwèù kubyàluja ku cishimikidi cya ndekeelu, ne cyôci aci ki Diyì dya Nzambi. Aci ncilelela.

¹⁰⁵ Ekeleeziya mmiibakila pa cimwe, cyambe ne: “Kaa, Yesu ùlwalwa pa kabalù katòoke. Mémè ndi mumanye. Ndi muMumone mu cikeena-kumona.” Pààbò kwibaka ekeleeziya wa mushindu awu. “Kaa, aleluuyah! Ùdi ùlwa pa ditutu.” Bâcyènza mu mushindu awu. Bibâtàpulula, ne bàbàkòsolola, ne bàbiikilangana muntu ne mukwèndè ne “mmuci wà ciikishilu cya tubangu-nyuunyi,” ne “cisòmbedi cya nkùsù,” ne byònsò kwa mushindu awu. Mona’s, mwaneetu, bìdi bileeja, anu kwine byònsò aku ne, mwoyi wèbè kí mmujaalàme kumpala kwa Nzambi to paùdi wenza nanku awu apu. Ncya bushuwa. Tudi bàna bàà muntu. Tudi ne cya kuswikakana muntu ne mukwèndè. Tudi ne dijinga dya muntu ne mukwèndè.

¹⁰⁶ Mpindyewu tàngilàayi. Shawùlà ùvwa mutwè cimpingà, kadi kuyaye kuntwaku. Yèyè, Nzambi, ùkaavwa muumushe mpala Wèndè kùdiye. Ki kuyaye kuntwaku ne kukonkaye baprofeta. Baprofeta kuyabo ne kuteetabo bwa kwamba ciprofeta, kadi Nzambi kukosaYe, kàyìkù mwa kufila cikeena-kumona to. Muprofeta kupatuka, kwamba ne: “Ncyèna ne mushindu to. Bwàlà. Yèyè kí mmungambilekù bwalu bwebe nansha bumwe to.”

¹⁰⁷ Ee, dìbà adi kwambaye ne: “Mukalenge, mpèèshèku ciloota.” Bufuku ne bufuku bwònsò, ciloota nansha cimwe kaciyikù mwa kulwa to.

¹⁰⁸ Pashiishe kubwelaye mùvwa Ulimà Tuumimà amu, kwambaye ne: “Éyì Nzambi wa yààyà! Ngàateeci ne baprofeta, ngàateeci ne biloota, mpindyewu Wèwè nkwàcishèku. Udikù mwa kunkwàcisha anyi? Bikòsa, Bukènkè nansha bwa kànà kabùyikù mwa kupenya.

¹⁰⁹ Pashiishe kunyeemenaye kùdi mwamùlopò, wa ciipanshi, wa mupwekeshiibwe milongo awu. Ki kuyaye kùdiye, wènda ùkalaba muntwamu ne kudyàlulayè. Ki mwamùlopò awu kuyaye ne kubikilayè nyuma wa Samwèlè.

¹¹⁰ Mpindyewu, ndi mumanye cyùdi wèwè wela meeji aci. Bààbùngì bàmbì ne: “Awu kàvwa n’Samwèlè to.” Kadi Bible mmwambe ne ùvwa n’Samwèlè, ne ùvwa n’Samwèlè. Bìdi bikèmeshà mùdi ubàkula aci’s, kí mmwòmò anyi? Kadi’s ùvwa n’Samwèlè. Bible’s mmwambe ne ùvwa nyèyè.

¹¹¹ Ne mwamùlopò awu ùvwa mwa kumubiikila bwa kubàndayè, ne wàkabiikila Samwèlè. Ne Samwèlè ùvwa mwaba mukwabo kampanda, kadi ùvwa mumanye bìvwà byènzekà abi, ne ùvwa anu mwimane muvwàle cikòwelu cyèndè cya buprofeta aci. Pa nanku, mwaneetu, paùdi ufwà, kwèna mufwe to, udi ne mwoyi mwaba kampanda, mwaba mukwabo kampanda.

112 Ngǎnjì kwimanakù kakese, bwa kupàtulakù ndambu dilonga dya maalu a baadémons edi. Mukaji awu ùvwa démon, kadi ùvwa mu dipetangana dya menemene ne cipaapu cya yôyi nyuma ayi. Mpindyewu, leelu ewu, kùdi beena mbùkù bààbùngì bàdi cya bushuwa bamanyè pa bìdi bitàngilà cipaapu cya yôyi nyuma ayi kutàmba bantu bàdi bàdyàmba mùdibo beena Kilisto, kadi pëndè mukaji awu's ndémon. Mu bikondo bya Bible cìvwa cintu cimwecimwe aci.

113 Pàvwà Yesu pa buloba apa, kùvwa balongeshi bàà tulaasa tutùmbùke ne bamanyi bàà mabàla ne balongeshi, bamwe bàà ku bàà batàmbe bulenga bàvwàku, bapàtùkile mu maaseminere a mimpè kutàmba atùdi twètù bafwànyine kupatula leelu ewu. Biine abu bantu bàà cijila, bàà luumu, bàvwa ne cya kwikala nanku. Bu bôbò mwa kupeta mwena Lewì, bìvwa bikèngela bàmpetè kàyi ne cya dimubanda naaci to, mwakane mu mishindu yònsò. Kadi pààbi yèyè muntu awu kàvwa mumanye Nzambi kutàmba mùdi kàlulù kamanye bilatu bya dyendela naabi mu nêjè to. Pààkalwà Yesu, yèyè muntu awu wàkapanga kuMujingulula, ne wàkabùikila Yesu ne “ndémon.” Kwambaye ne: “Yèyè m'Beelèzèbùlà, mfumu wa baadémons.” Ncya bushuwa anyi?

114 Kadi ki démon wa mushindu wà mutàmbe kushààdila ulwàlwa ewu, uvwa muswikìle muntu mu nkita mwàmwa, ne bikwabo byònsò, ne kwelayi mbila. Démon yèyè mwine awu kwambaye ne: “Tudi bamanye ne Wèwè udi Nganyi. Udi Mwànà wa Nzambi, Wa Cijila awu.” Ncya bushuwa anyi? Baamwamùlopò ne bampàkààmàngà, baadémons, kuMujingululabo bu Mwànà wa Nzambi; pàvwà bayiishi bàvwà balongè tulaasa, bàà ku seminere ya teòlòjì baMujingulùle bôbò ne m'Beelèzèbùlà. Uvwa mu bulelela mwaba awu ki nganyi, ki démon awu anyi ki muyiishi awu? n'Démon awu. Nenu, mwaneetu, kî mbishintùlùke bikole menemene leelu ewu to. Kabeena bàjingulula bukole bwa Nzambi to.

115 Nansha wèwè mupete dilongesha dyàbùngì bishi, udi mwa kudipàyikaci mu mutu amu. Nzambi kàtu mu myaku ya bujitu to. Nzambi ùtu mu mwoyi wa meeji matooke. Udi mufwànyine kwimana apa, kushindumuna myaku ya bujitu, mùndi mupange ne mwa kubyàmba, aci kacýèna cikufikishakù pabwìpi ne Nzambi to. Udi mwa kwimana kadi kuyiila mwa kwambulula diyiisha dyebe ne kwamba byôbi bintu ebi, aci kacýèna cikufikishakù pabwìpi ne Nzambi to. Udi mwa kulonga nkòngamyakù too ne mùdi ulààla nendè, kadi kî ncifwànyine anu kukufikisha pabwìpi ne Nzambi to. Mwoyi mudìpwekèshe, mudifile, mu bupwekèle bwònsò, ki wùdi wùkufikisha kùdi Nzambi. Ne aci ncilelela. Amen! Mwoyi mudìpwekèshe, ngudi Nzambi munange. Mpindyewu, nansha wèwè kùyi mumanye ABC to, aci kacýena ne cidici cishintulula nansha. Anu mwoyi mudìpwekèshe cyanààna! Nzambi ùtu ùsombela mu mwoyi

mudipwekèshe; kî mmu tulaasa tulonga to, kî mmu bilongelu to, kî mmu tèlòjì to, mu maaseminere to, kî mmu myaba mikwabo yònsò mishiileshiiilàngàne eyi to; kî mmu mèyì a bujitu, anyì mu myaba ya yìkòka ntema to. Nzambi ùtu ùsòmbela mu mwoyi wà muntu. Nenku paùdi utàmba kudipwekesha, utàmba kulwa mupwekèle, mpaùdi mwa kulwa mutàmbe bunene ku mèsù kwa Nzambi.

¹¹⁶ Ngǎnjì nnùpèèshèku cintu kampanda. Ntu mmona madimi enu mùle ne blé mwab'ewu. Mutu wà blé wùdi mùle mupàte wùtu misangu yònsò anu mwiname. Kaalutònga kakese aku nkalulàme mwaba awu, ne kàdikùpa eku ne eku bu ne nkamanyè byònsò, kakeèna ne kantu mu mutu amu to. Kì mùdìbì ne balumyana búngì cyanààna aba bàdì bèèla meeji ne bàdì naabi byàbúngì mu mitu yabo abu, kadi nansha nanku, kabàyi ne kantu nansha kamwe mu myoyi yabo to. Mutù wà cijila newinaminè Bukole, wùjingulula Yesu Kilisto bu Mwànà wa Nzambi, ne wìtabuuja byenzedi Byèndè.

¹¹⁷ “Ne Yèyè ùdi umwèumwè awu makeelela.” Kaa, bòbò bàdì bàMujingulula, bushuwa, mu mmwenenu wa maalu-malonda. Kadi kî ncintu cya mu maalu malonda to. Bantu bàdì bàjuuka bàmba ne: “Kaa, mèmè ndi ngiitabuuja Mpenta, wa pààkapetàbo dipongolola dinene adi ne bintu bya mushindu awu apu,” kadi bàzòla mudilu. Muntu munkaci mwa kuumininya ne mashika kèna mwa kudinànga ku mudilu muzòla to. Mudilu muzòla kawùtu ùfila luuya to. Kì cìvwàbo bòbò ncyòci aci. Bwalu bùdi cinyi leelu, pìikalàYe umwèumwè awu makeelela, leelu too ne kashidi? Aci's mmudilu muzòla's. Muntu kampanda ùumininya ne mashika, wàmba ne: “Mona mudilu munene wàwa wùvwàbo naawu.” Kaa, aci kaciyèna cìkupèèsha luuya to.

¹¹⁸ Cyàkenzàbo dya Mpenta aci, cìvwàbo naaci ku ntwadijilu kwa Dipungila aci, s'ncitùdi naaci leelu eci! Kadi pìikalà anu Nzambi mupete mwa kuumusha mifudì yònsò ku cintu aci, ne Ekeleziya mudìsangè, Dyambwibwa nedilwe. Kadi nyewu katùyì nansha mwa kupeta diitabuuja bwa dyonropa dya kùdì Nzambi, bwa Dyambwibwa kaayì katwàmbi to, bwalu twètù bònsò tudi bakònyangaja, ewu muye *nunku* ne ewu muye *nàka*. “Docteur *Kampanda's* mmwambe ne Cìvwa *ncikampanda*. Ee, muiyishi wanyì's mmwambe ne Ùvwa *Cikampanda*.”

¹¹⁹ Kwènjì ntanta, mukaji kampanda ùvwa wàmba ne: “Yèyè's ùdi anu mushimakajanganyi cyanààna.” Wàmba ne: “Kì mùdì nsaserdose wanyì mungambile.” Mèmè ndi njinga bwa nsaserdose wèndè awu wàfikakù mwaba ewu kasangu nansha kaàmwè cyanààna, bwa twamòna ne mushimakajanganyi ki nganyi. Eyowa's. Netùmonè mushimakajanganyi ne nganyi. Àlwe àteetè.

¹²⁰ Kaaba aka kî nkwanjì kwenza ntanta to, mu Harlingen, mu Texas, tuvwa twenza disangisha muntwamu. Nenku bàvwa

Yèyè ne: “Aci mbulelela bwa menemene.”

¹²⁵ Ki mêmè ne: “Mu njila mu dilwa amu, nuvwa bambe kubunguluka ne kashinyi. Wèwè ne mwânà wa bakaji ewu nuvwa nuseka panwâfikî mwaba wùvwa citùpà nshâamendâ citùpà kaabùdimbwâ, ne nuvwa nwela cibèndâ.”

Yèyè ne: “Mwaneetu Branham, aci’s mbulelela!”

Mêmè kwamba ne: “Nenku, EMU MMÛDÌ MUKALENGE WÀMBA, mwânà wa bakaji awu wòndòpiibù.”

¹²⁶ Dituku dyàkalondâ yèyè kukwacila cimenga cijimâ ku byanza, wènda ùlondela bantu bônso, ùcyâmba myaba yônso. Mu bushuwa bwa bwalu, kabâvwa bamumanyè mwômô amu to, bwa ne ùkaavwakù mu mushindu awu anyi kâvwamù to. Nenku diine dituku adi mêmè. . . Mwaneetu Baxter kwambaye ne: “Mwaneetu Branham,” yèyè ne, “bânâ bàâ bakaji abu bàdi kuntwaku munkaci mwa kulongolola mishèètè yabo ya lwendu.” Kadi eci ncintu cimwepele civwâye yèyè kâyi mumanye to cimvwa mêmè mumanye. Mfranga yetu yikaavwa mikèèpèle bibi be. Ncitungù mmulekela ùbyâmba to. Kadi umwe wa ku bânâ bàâ bakaji abu ùkaavwa mwele ndola nkama citeema mu—mu milambu amu dilòlò adi kumpala kwa cyôci aci, ne mubândishe mfranga ayi bikole. Mpindyewu, yèyè kâvwa mucimanyè to, kî mmucimanye to too ne leelu ewu, kadi mêmè mvwa mucimanyè. Nwamonu anyi? Bwa mêmè. . . Nzambi ùvwa mungambile ne byônso nebiikalè bîmpè.

¹²⁷ Nenku Mwaneetu Baxter kwambaye ne: “Mwaneetu Branham,” yèyè ne, “anu wèwè mundekèlekù mêmè mwenzè dilomba dya mfranga ndambu.” Yèyè ne: “Mbapete bamwe bàâ ku bondopi bàâ kùdi Nzambi muneemu bàdi anu balòmbelòmbè mfranga ya bantu aba.”

¹²⁸ Mêmè kwamba ne: “Nansha kakese. To, mukalenge. Kwâkucyènzakù to. Mwaneetu Baxter, dîbâ dyônso diwâdidìngâ anu kwenza malòmbâ a mfranga mushindu awu, mêmè ne wèwè ki dîbâ adi ditwâlâbulanganâ neebe ku cyanza bu bânâ bàâ muntu, pàányi mbanga diya nkââyaanyi.” Wamònu anyi? Mêmè ne: “Kwènji nanku to.” Mêmè ne: “Nzambi ùdi ne ngombe pa mikuna cinunu, ne bintu byônso m’Byèndè Yèyè. Mêmè ndi Wendè Yèyè. Yèyè ngwankùba.”

Yèyè kwamba ne: “Eyo.”

¹²⁹ Ki dilòlò mene adi kwambaye ne: “Mwaneetu Branham, tàngilâ kuneeku. Muntu kampana. . . Tàngilâ kuneeku! Mona envelope muntwemu, kâyi ne dînâ difundapù to, mwikàlemù ne tubeji citeema twa ndola lukama. Anu menemene yitùdi naayi dijinga bwa twètù kudipetulula’s.”

Mêmè ne: “Mwaneetu Baxter.”

Yèyè ne: “Mfwilèku luse.”

¹³⁰ Nenku díbà adi mêmè mvwa mumanye ne ùvwa mmwânà wa bakaji awu. Ki pashiishe—pashiishe dituku dyàkalondà, Mwaneetu Baxter kwambaye ne: “Mwaneetu Branham, bàdi kuntu kwàka bàlongolola bilàmbà byabo, munkaci mwa kudila myadi.”

Mêmè ne: “Bwalu budi cinyi?”

Yêyè ne: “Mbîmpè ùyekù kuntwaku ùkabàmone.”

¹³¹ Mêmè kuya ku cibambalu civwàbo bàsanganyibwa aku. Mêmè kwamba ne: “Bàdi mu cibambalu kaayi?” Mêmè kuyakù e kukookola ku ciibi. Mêmè kuumvwa bàdila myadi. Mêmè kukookola ku ciibi, ki mwânà wa bakaji awu kulwaye ku ciibi aku, kwambaye ne: “Kaa, Mwaneetu Branham, mfwilèku luse.” Yêyè ne: “Mêmè ngudi mukukebele lutatu lwônsò elu.”

Mêmè kwamba ne: “Lutatu? Bwalu bùdi cinyi, mwaneetu wa bakaji?”

Yêyè ne: “Kaa, mêmè’s ngwâfikishi beena FBI ku dikulumbata.”

Ki mêmè ne: “Kaa, kî mùdi bwalu anyi?”

¹³² Yêyè ne: “Eyowa’s.” Yêyè ne: “Ngeela meeji ne ndi mutàmbe kufila bujaadiki mu cimenga cijimà lelu ewu, ne bikwabo byônsò.”

Mêmè ne: “To.”

¹³³ Kadi kwambaye ne: “Mwaneetu Branham, beena FBI’s nyawu bàdi kuntu kwàka, bàdi kuntu kwàka, mbaswe kukwela patòòke dilòlò edi.”

¹³⁴ Mêmè kwamba ne: “Ee, pìikalàbi ne ndi—pìikalàbi ne ndi ngenza cintu kampana cya cibi, s’bidi bikèngela bwa bàngeelè patòòke.” Wamònu anyi? Mêmè ne: “Bushuwa. Pìikalàbi bikèngela ne kuyiisha kwa Evanjeeliyo kwèdiibwè patòòke, ee, tucyènzàayi’s.” Wamònu anyi? Mêmè ne: “Mêmè—mêmè—mêmè ndi ne mwoyi nku Bible ewu, nenku cidi Bible ewu kàyi wàmba to . . . Ewu ki wanyì ngabu, mwab’ewu mene. Wamònu anyi?” Ki mêmè kwamba, ki yêyè . . .

Yêyè ne: “Ee,” yêyè ne, “mfwilèku anu luse bwa pândi mwenze cîndi mwenze aci.”

Mêmè ne: “Wêwè kwênàku ne cyûdi mwenze nansha cimwe to, mwaneetu wa bakaji.”

Yêyè ne: “Ee, wêwè kwêna ucîna bwa kuya kwòkò kuntwaku tô?”

Ki mêmè ne: “To.”

Yêyè ne: “Ee, beena FBI’s bàdi kuntwaku.”

¹³⁵ Mêmè ne: “Mêmè’s nkààvwakù mubàmòne balwè mu disangisha dyànyì kumpala ne kusùngidiibwabò.” Mêmè ne: “Mukalenge Al Farrar . . .”

¹³⁶ Kàpíteenà Al Farrar, bààbûngì bàà kunùdi's mbamanye dikudimuna dyèndè dya mucima mu Tacoma mwàmwa, mu Washington, wàkasungidiibwa, mu nzubu wa dilongeshilangana dya ndudi ya bingoma. Kulwaye mu disangisha adi, kwambaye ne: “Ndi mulondeshe muntu ewu munda mwa bidimu bibidi emu. Ne ngâkumvwa bàmba bwa mpetu, ki mêmè kubùtàngila, ne kubùkenketa myaba yònsò too ne kundekeelu.” Ne kwambaye ne: “M'Bulelela, unùdi nutèèleja dilòòlò edi kî mmukoleshi wa maalu to, nudi nutèèleja Bulelela.” Yèyè kwamba ne: “Umwe wa ku bantu bàdi mu bampulushi, mwena mwànà ûmvwà mulombe ngangabuka bwa kumukenketaye ne mêmè kumupicisha mu mulongo wà babeedi awu,” ki yèyè ne, “bààkambila mwànà awu anu menemene civwàye ùsaama, ne civwà cimwenzেকে. Ne kwambaye ne: “Mu matuku mwandamukulu neààlukilè mu kalaasa,” disaama dya tunèkè. Ki yèyè ne: “Mu dituku dya mwandamukulu mwànà awu wàkaalukila mu kalaasa.” Yèyè ne: “Ndi mumulondeshe munda mwa bidimu bibidi,” kumpala kwa bantu binunu dikumi. Ki byònsò abi . . . Ki fòtò waci nyèyè awu, disangisha dya mu Seattle, mu—mu mukanda wènu. Yèyè ne: “Ndi muswe bwa nwènu bònsò kumanya ne unùdi nutèèleja kî mmuntu kampana wa mafi wa mu maalu a ntendeleelu to. Cinùdi nutèèleja m'Mbulelela.” Kàpíteenà Al Farrar. Ki dituku dyàkalondà mêmè kumufikisha kùdi Nzambi, ne kupetaye dibatiiza dya Nyuma Mwîmpè, mu nzubu wa dilongeshilangana dya ndudi ya bingoma, mu mwaba munene kuntwaku.

Mêmè kwamba ne: “Pàmwăpa muntu ewu neñzè bya mwomumwe.”

Pa nanku mwànà wa bakaji awu kwambaye ne: “Wèwè udi uciina bwa kuya kwòkò kuntwaku anyi?”

¹³⁷ Mêmè kwamba ne: “Nciina? Mona's, cya bushuwa ncyèna nciina to. Cya bushuwa ncyèna nciina to. Nciina bwa cinyi pàdibi ne Nzambi ngudi muntume bwa kucyènza? Yèyè's Ngudi ulwangana mvita ayi, kî mmêmè to.” Ki mêmè kwamba ne: “Mpindyewu, ndi muswe bwa nwènu bònsò nùshaalè ku luseke.” Ki pa nanku . . .

¹³⁸ Twètù kuya ku disangisha adi dilòòlò adi, mwaba wùvwa mùle patapata. Ki mukùbi wa mwaba awu kulwaye, kwambaye ne: “Révérend Branham, ndi mufute bânà beena Mexique dikumi.” Yèyè ne: “Tàngilà umone: ‘Révérend Branham neikalè ne cya kwediibwa patòòke dilòòlò edi kùdi beena FBI, bu mulongi wa maalu a ntendeleelu mukoleshi wa maalu,” anyi cintu cya mushindu awu. Ki yèyè ne: “Ncilamika pa kònsò kàà ku tùshinyi. Balamunè . . .” Yèyè ne: “Ndi mufute bânà bakese dikumi bàà beena Mexique, nebàbilamunè byònsò bàbitèkè apa.” Yèyè ne: “Kaa, s'ndi ngumvwa mêmè anu bu wa kupya mulumyana awu mu mikaba!”

139 Mémè kwamba ne: “Kùdítàcishi to, mukalenge. Nzambi ngwámupyà mu mikaba.” Nwamònu anyi? Mémè ne: “Mulekèlè anu cyanààná.”

140 Ki kulwaye kùndi. Ne dilòòlò adi patwàkabwelà, ncyàdyàkucìpwakù mwoyi to, mémè kubwela mu cibambalu amu. Mémè...Mwaneetu Baxter kwimbaye *Itàbùùjà Nàka*. Kwambaye ne: “Mpindyewu, Mwaneetu Branham ùdi wamba dilòòlò edi bwa twètù kushiya citanda eci.” Yèyè ne: “Nènye mundekeelu mwàmwa nkasòmbèlèmu.” Yèyè ne: “Mbadìlongòlòle bwa kumwela patòòke dilòòlò edi pa cibumba cya ku cyambilu apa.” Yèyè ne: “Nkààdikù mumumonemone mu mvita yàbúngì ya mikole, ne mumone Nzambi wàngata kaaba kèndè.” Yèyè ne: “Mémè—mémè nyààya anu cyanààná mundekeelu mwàmwa nkasòmbè.”

141 Mémè kusemena. Mémè kwamba ne: “Ndi mfuma ku dibala kaabwalu kakese kaaba aka ne nebàngeelè patòòke dilòòlò edi pa cibumba cya ku cyambilu apa.” Mémè ne: “Ndi muswe bwa beena FBI bàlwe kumpala eku mpindyewu bàngeelè patòòke pa cibumba cya ku cyambilu apa.” Mémè ne: “Ndi mwimane mwaba ewu bwa kwakwila Evanjeeliyo; ndi muswe bwa nùlwe kungeela patòòke.” Mémè kushààla mwindile. Mémè kwamba ne: “Pàmwàpa kí mbanjì kufika to.” Mvwa mumanye mwaba wùmvwà. Yèyè ùkaavwa mumane kundeeja mu cibambalu cyànyì kuntu kwàka, cìvwà ne cya kwenzeka, kumpala kwa mémè kwasa lwendu, nudi numona’s. Ki mémè kwamba ne, mémè ne: “Pàmwàpa nêngǎnjì anu kwindila kakese. Tudi mwa kwimbakù musambu anyi?” Ki muntu kampanda kulwaye e kwimbaye musambu wà muntu nkàâyèndè.

142 Mémè kwamba ne: “Wèwè Mukalenge mwena FBI, udi munda emu anyi udi pambelu? S’mémè ewu mwindile bwa ngèèdiibwè patòòke. Udikù mwa kusemena kumpala eku anyi?” Muntu nansha kulwa. Mémè kutungunuka ne didìkonka mwaba wùvwàci. Mukalenge ùvwa mungambile ne cìvwà ncikampanda. Bàvwa mbayiishi babidi bàà batwè cìmpingà, nenku mémè—mémè mvwa ntàngila. Mémè kumona mundidimbi mufìlke mulembelele mu ditumba. Mémè kumanya mwaba wùvwàci. Mémè kutùmakù mèsù, kubàndacì buludi muulu ne kubwelaci mu cisàsà mushindu ewu. Muntu muvwàle nkooci wa bleu, ne mukwabo muvwàle wa cisengàsèngà.

143 Mémè kwamba ne: “Balunda bàànyì, kakwena cya beena FBI aci to. Ndyumvwangana kaayi didì pankaci pàà FBI ne kuyiisha kwa Bible?” Mémè ne: “Cya bushuwa ne kí nnanku to. Kabàvwa mbeena FBI babidi bàvwa ne cya kungeela patòòke to. Kadi, dileeja dya patòòke ki dyòdi edi’s, s’ki bòbò bàdi basòmbè lwà kuulu kwàka bàba, bayiishi babidi bàba anu mwaba wàwa mene.” Ki kutuulukabo. Mémè kwamba ne: “Kanutuuluku mushindu awu to.” Nenku bantu banene babidi bàà beena Texas bàkaavwa bàbànda bwa kubàkwàta. Mémè kwamba ne: “To,

bânà beetu, eci kî mbwalu bwa munyiinyi ne mashi nansha, sòmbaayi anu tàlàlà. Nzambi neàtangile bwalu abu.”

144 Mémè kwamba ne: “Mpindyewu, bânà beetu, tàngilàayi, panùcìdi kuulu aku apu, tàngilàayi kuneeku.” Mémè ne: “Piikalàbi ne... Nwènú nudi bambe ne mémè ndi Simonà mwena màjimbù, mwikàle ne mupongo, ndowa bantu.” Mémè ne: “Piikalàbi ne mémè ndi Simonà mwena màjimbù, nanku nwènú’s mbàdi balume bàà Nzambi. Mpindyewu tùlukààyaaku nulwe pa cibumba cya ku cyambilu apa. Ne piikalàbi ne mémè ndi Simonà mwena màjimbù, Nzambi ànshebèyè. Kadi piikalàbi ne mémè ndi muprofeta wa Nzambi, tùulukàayi Nzambi anùshebèyè. Mpindyewu netùmonè ne udi mubinge nganyì ne udi mupiile nganyì. Tùulukààyaaku mpindyewu. Nétwímbaayi musambu.” Mbatuke mu citanda amu bayè, ne kacya anu piine apu katwàkabàmònakù kabidi to. Nwamonu anyi? Mémè kwamba ne: “Lwàyaaku’s. Piikalàbi ne mémè ndi Simonà mwena màjimbù, Nzambi ànshebèyè mémè. Kadi piikalàbi ne mémè ndi muprofeta wa Nzambi, dībà adi Nzambi neànùshebèyè nwènú panwàfikà pa cibumba cya ku cyambilu eci. Mémè mulelèlà kumpala kwa Nzambi, Nzambi neànùshebèyè pa cibumba cya ku cyambilu apa.” Bàakamanya civwà cikèngediibwà. Neya bushuwa. Bàakamanya civwà cikèngediibwà. Bàkaavwa bumvwe bya myaba mikwabo. Neya bushuwa. Pa nanku kanwèdikù meeji makwabo to anu a ne Nzambi ùdi anu Nzambi. Yèyè ùdi wàndamuna.

145 Mpindyewu, mwamùlopò wa mu Énè-Dò ewu, wàkasòka nyuma wa Samwèlè. Ne Shawùlà wàkayikila ne Samwèlè. Mpindyewu, wèwè udi mufwànyine kudikonka ne aci civwa mwa kwikala cyenzèke bishi. Kacyena mwa kwenzeka leelu ewu to. To, mukalenge. Bwalu, mashi a bimpàngà bya ngombe ne a mbuji àvwa anu mindìle cikondo cya dikumbana. Pàvwà muntu ùfwa mu miine matuku awu... Nwènú bayiishi, nùntwaayikù nyama ku mikolo panwìkalà nwela meeji ne nCilelela. Pàvwà muntu ùfwa, ùvwa ùfwa mwinshi mwa difuta dya cibawu dya nyama, ne musuuka wèndè wùvwa wùya mu Mpàlàdiizò. Neku ùvwa ùshàalamù too ne ku cyòci aci, too ne—too ne ku Dituku dya Bupikudi. Neku musuuka wèndè wùvwa wùsanganyiibwa muntwamu.

146 Ngǎnjì nnùzòlèlèku kaacimfwànyì kakese mwab’ewu. Mbanganyì bàtùku babalè kaabwalu kàànyì, anyì kaabwalu kàdìbo bafunde bwànyì mémè mu *Reader’s Digest* emu, lwà mu nomba wa ngondo wa dikumi, wa dikumi ne umwe? Eyo. Nuvwakù bamòne mùvwàku anyi? Nuvwakù bamòne, bu mbingu yibidi anyì yisatu kumpala kwa cyòci aci, mwamùlopò munene mwèndè luumu ewu utubò balumbulwìshèlumbùlwìshe kacya kùkaadi ntanta mule ewu, yèyè, Mándèmwàzèlè Piper. Muntu ùkaadikù mubale cyòci aci, kaabwalu kàà Mándèmuàzèlè Piper

mu *Reader's Digest* aku anyi? Kabyènakù bikèmesha mùdi nyuma yibidi ayi. . .

¹⁴⁷ Nkunshààdile díbà búngì munyi? Anu ndambu mukese cyanààna. Ndi mu makumi abidi paanyima, nebikengelè anu bwa ndwijakajè. Ndi mumanye ne nudi ne. . .Tàngilàayi, mfwilaayikù luse bwa katanci kakese.

¹⁴⁸ Nudi bamanye's, kùdi—kùdi cya mafi. Kùdi cilelela ne cya mafi mu bintu byònsò. Mémè mukupèèshe ndola, ngamba ne: “Ewu ndola ngwa mwìmpè anyi?” Nenku udi mufwànyine kumutàngila, nebikengelè ikalè mufwànàngàne bikole ne ndola mulelela bwa cyanààna kwéna mufwànyine kumwitabuujà to. Ncya bushuwa anyi? Pa nanku nebikenglé cùikalè anu menemene ditentula dya dímpè.

¹⁴⁹ Nenku piikalàbi ne Yesu wàkamba ne nyuma yibidi ayi mu matuku a ndekeelu neyikalè mifwànàngàne menemene mu mushindu wà bifwànyine kuseeswisha ne Basungula mene bu ne bivwa mwa kwenzeka, batendeleedi. Mpindyewu vùlukàayi. Mpindyewu, kakwena cintu nansha cimwe muntwamu mu ya kale ya mashik-. . .ya kwis-. . .ya mashika, ya kwisùkwisù ayi. Lwà pambelupambelu apu bàdi anu ne cimwenekelu cya difwàna dya Nzambi, nudi numona's. Kadi nyuma yibidi eyi, nyuma milelela, neyiikalè mifwànàngàne menemene mu mushindu wà bifwànyine kuseeswisha ne Basungula mene, mushindu wùvwàyi yikwàta mudimu mitwàngàne nkundù mu matuku a ndekeelu. Yesu wàkamba nanku anyi? Eyowa.

¹⁵⁰ Mpindyewu tàngilàayi, nwénù balunda bàanyi, nènñùzòlèlèku kaacimfwànyì kakese. Ndi muswe bwa nwénù kutàngila kuneeku bwa katanci kakese cyanààna. Nenku mpàayi maci enu ònsò, bwalu ndi muswe kunùpèèsha lusumwinu, nenku díbà adi nenùcùmvwè.

¹⁵¹ Mpindyewu, mu *Reader's Digest* amu, ncifùndamù, mwva mwimane mwaba awu, tuvwa ne bantu binunu bibidi ne nkama mwandamutekete bindile bwa kubàsambidila, biimàne mwaba awu. Nwâbalaayi kaabwalu aku. Nenku muntu ùvwa mufùmìne ku Canada, ne ùvwa ne mwànà mukese wa balume ukàávva ku ba-Mayos ne ku Johns Hopkins, disaamà dikole dya mu bwongò divwà dikònyàngaje twanza twèndè tukese atu mushindu *ewu*, ne tukòlò tudibùnyine mwinshi mwèndè. Ki kwambabo ne: “Kakwena nansha nî ndimupanda nî ncinyi cidì mwa kwenjiibwa to.”

¹⁵² Pa nanku kwalukilaye nendè ku Canada. Kwambaye ne: “Ncyèna anu mwanjì kucimunyiibwa nansha.” Angàtaayi nomba wa ngondo wa dikumi ne umwe wa *Reader's Digest*, ne mbacibiikile ne—ne *Cishimà cyà Donny Morton*. Ne—ne pashiishe mbambe, mwômò amu ne, mu—muntu awu wàkamba ne: “Ncyèna anu mwanjì kucimunyiibwa nansha, bwalu ndikù mumanye mwondopi wa diitabuujà dinà dyèndè William

Branham, wâkafikisha balunda bàànyì babidi bàvwà tumàmà ne mpudimaci ku dyakula ne dyumvwa.”

¹⁵³ Ki kubiikilabò ku telefone bwa kuteeta bwa kupeta mwaba wûmvwà nsanganyiibwa, ncivwa mu—mu Amerike. Nenku mvwa mu Costa Mesa, mu Californie. Ne cyôci nkaabwalu's, paùdi ukàbala, s'udi umvwa mwa kwasa mwadi. Nekâfikishè mwoyi wèbè ku dicibuluka. Mushindu mwine wâkayàye wènda ùpicila mu mishiki ya nêjè, ne bikwabo byònsò, ne mwânà awu's wè! Kwambaye ne: “Ikàlà mudimùke, Donny.” Yêye ne: “Mpindyewu, katwena anu bacimûnyìibwe nansha.” Ne mwânà mukese wa balume awu kàyikù nansha mwa kufùkisha mimwemwe to, bikole's, ùvwa mu lutatu lukole. Yêye ne: “Katwena anu bacimûnyìibwe nansha, netùkakonkè Nzambi. Netùye kùdi muprofeta wa Nzambi tükamukonkè.”

¹⁵⁴ Ki dîbà adi kulwabo bènda bàpicila mu nêjè. Ki ndekeelu wa byònsò kufikabo kuntwaku, ne maamù ùvwa ùlwa naabo, kadi kabàvwa ne mfranga bùngì bukùmbàne bwa kwangatabo ndèkè to, ki kwalujabo maamù awu. Nenku kukèngelabi bwa papa ne mwânà awu kulwabo ku bis, ne mwàkalwàbo njila mujimà awu kuumukila ku Winnipeg, mu Canada, too ne ku Costa Mesa, mu Californie. Ki kubwelabo muntwamu, bacibùlùke, ne taatù wàmba mushindu wùvwaye ne cya kumushintulula mikàâyà yìvwà mimwela ayi, mwânà mukese wa balume wa bidimu bitwè ku mwandamutekete anyì ku mwandamukulu, kàyikù ne pabwàsà to. Ne mùvwàye mufwànyine. . . kàyikù mwa kupeta mpungà wa kudyàku kantu to, ne wàmba ne mwanèndè mukese wa balume awu ùvwa mwa kuumumvwa anu pàvwàye wàkula apu. Ne ùvwa mwa kumanya ku mmwenekelu wa mèsù èndè awu ne, ùvwa—ùvwa ùteeta bwa kufùkisha mimwemwe, nudi bamanye's. Ne ùmánya ne yêye. . . Ùvwa ùmwambila bintu bishìlèshìlàngàne bìvwàye ùmòna, mu Amerike amu.

¹⁵⁵ Nenku pààkabwelàbo muntwamu, mu Californie, kwambilabo mùcyungà, cìvwàyè mulwe bwa kumona. Awu kwambaye ne: “Mulwe bwa kumona nganyì wa kùdi Nzambi?” Ne cikonkelu cinène.

¹⁵⁶ Mu bushuwa bwa bwalu, nudi mwa kudifwànyikijila cìvwà Amerike wàmba pa bwalu abu's, nudi numona's. Nwamonu's, ki twètù abu, nwamonu's, “Twètù tudi bàà meeji matwe bikole! Tudi bamanyè byònsò, udi mumanye's, ne kabyena ne mushinga bwa wèwè kutwambila kantu nansha kamwe to. Byònsò tudi naabi bimana kufùnda.” Nwamonu anyì?

¹⁵⁷ Ki dîbà adi, pa nanku: “Nganyì wa kùdi Nzambi? Mwendè njila mujimà muumukile ku Winnipeg, mu Canada?” Mona's, kwelabo meeji ne aci cìvwa cya cikwàcisha bwòwà.

¹⁵⁸ Byòbì biine, bafùndì bàà cìbejibeji bààkalongolola kà—kàshinyì ne kumutuma kuntwaku. Nenku kwambaye ne, pààkafikàbo mu mulongo, mwaba wùvwàwu awu, kwambaye ne

bantu binunu bibidi ne nkama mwandamutekete bàvwa bindile bwa kubàsambidilabo. Kadi kwambaye ne, pààkamomònàbo mwànà mukese wa balume, wa mmwenekelu mukonyangale awu, ne papa wa mukwàte ne bya luse uvwa mwase kafulu awu, ne nkoozi musùnsùke, kwambaye ne bantu bônso bàakadisàka ku luseke ne bàakamushilà mwaba. Mmwenze anu ùfika pa cibumba cya ku cyambilu. . .

¹⁵⁹ Mbibèngàngàne ne mèyi ne mikàndu bwa kushintakaja karta kàà disambila. Muntu ùdi ne cya kulwa mu disambila ne kupeta kèndè karta kàà sungasunga. Bòbò anu badidinge bakukwàte mu mulongo, ushintakaja twarta twa disambila ne muntu mukwabo, karta kàà disambila aku bwàkù bwàjiki. Nwamonu anyi? Bwalu udi ne cya kulwa kutèeleja dileeja dya njila ne kumanya mwa kukàpeta. Mbwalu bwebe wèwè. Kwèna mwa kukàngacila muntu mukwabo to. Bikèngela ùlwe ùdyàngàcilèku wèwè mwine, bwa ùteelejè. Muntu munene kampanda wàkamba ne: “Bu. . .Ee, mèmè ncyèna ntàmba kwitabuja cintu eci to. Kadi, pàmwàpa Yèyè muungondòpe, ndi. . .” Nudi numona anyi? Ne dìbà adi aci cidì cijuula makokyanganyi pa cibumba cya ku cyambilu, pa nanku bàdi anu bàshipa cintu aci kumpala kwa kufikaci mwaba awu.

¹⁶⁰ Pa nanku mwànà awu mmwenge anu ùseemena, anyi taatù awu ùseemena pa cibumba cya ku cyambilu apu, kumpala kwa bantu abu, Billy kumulombaye karta kèndè kàà disambila. Kàvwa naaku to. Yèyè kwamba ne: “Nanku ùmfwilèku luse, mukalenge.” Yèyè ne: “Nebikengelè wìndilè.”

¹⁶¹ Yèyè ne: “Eyo.” Yèyè ne: “Nèngìndilè.” Yèyè ne: “Nanku, nèndwe anu pa dyànyi dìbà bu bakwabo.” Yèyè ne: “Ncìvwa mumanye ne bìvwa bikèngela bwa mèmè kwenza aci to.”

¹⁶² Nanku mèmè mwana ngaakula ne muntu kampanda, kwenzekabi ne ngùmuvè cyòci aci. Mèmè kumona taatù awu wàsa lwendu ùya, ki mèmè kwamba ne: “Bwalu bìvwa cinyi?”

Yèyè ne: “Kàvwa ne karta kàà disambila to.”

Ki Cintu kampanda kungambila ne: “Mwalùjè.”

¹⁶³ Ki mèmè kwamba ne: “Lwà nendè mwab'ewu.” Nanku taatù awu kulwaye, ne binsonji bìmupwekela pa matama, myedi kayiyi mikungula. Nanku yèyè—yèyè kuseemena, ne cidì *Reader's Digest* mwambe ncyòci eci. Nwamonu anyi? Ncyàkeela nkonko to, kadi ngàkatàngila buludi mumpala mwa mwànà awu, kwambila mwànà awu kùvwàye mufùmìne, mùkaavwàye muye ku Lupitaadi lwa Mayo, ne lutatu lwònsò lùvwàye ùsaama, kusaama kùvwàye mupicile, ne bikwabo byònsò.

¹⁶⁴ Ki mwaba awu taatù awu kwasaye mwadi, ne kubangaye kuumuka. Ne ncyambe ne wàkaasa lwendu ùmuka pa cibumba cya ku cyambilu, kadi kukudimukaye, kwambaye ne: “Ncyà bushuwa, mukalenge.” Kwambaye ne: “Kadi mwanàanyi nèikalèku ne mwoyi anyi?”

165 Mêmè kwamba ne: “Bwa aci mêmè ncyèna mwa kumanya to.” Mêmè kwamba ne: “Anji indila kakese.” Mêmè kumona cikeena-kumona cimweneka. Mêmè kwamba ne: “Kwàkuswà bwa kwitabuuja eci to, bwalu ku Mayos ne ku Hopkins bônso mbambe ne dimupanda adi kí ndifwànyine kwenzeka mu bwongò to, kadi mêmè nènkwambile cyùdi ne cya kwenza. Wêwè, mààlabà, asà wêwè anu lwendu ùye ne mwànà ewu. Munda mwa matuku asatu àdi àlondà aa neùtuutakeenè mu mùsèèsù ne muntu mukaji wa nsuki mifiike, ne mukaji awu neàkukonkè ne ncinyi cidi mwànà awu ùsaama. Ne pashiishe yêyè neàkwambile bwa ngangabuka kampanda wa ku musoko muneemu emu udi mwa kwenza dimupanda adi, kadi kwàkuswà bwa kuciitabuuja to, bwalu beena ku Mayos mbamubenge bambe ne: ‘Kacyèna mwa kwenzeka to.’ Kadi ki mpungà umwepele udikù nendè mwanèbè awu, ku bukole bwa Nzambi, luse lwà Nzambi ne dimupanda adi. Mpindyewu, wêwè mwiitabuuje ne mêmè ndi muprofeta Wendè, nda wènzè mùndi nkwambila amu.” Byenzè bu kulamika kwa mabeji a mfigi pa Ezèkìyà’s, ne bikwabo.

Kwambaye ne, kukudimukaye ne kwambaye ne: “Twasakidila.” Kuyaye.

166 Kupitakù matuku abidi anyi mapite apu, nenku yêyè ùvwa ùsanganyiibwa mu mùsèèsù dîngà dituku, ki inàbànza kampanda ewu pwàà, kwambaye ne: “Mwanèbè awu ùdi ùsaama cinyi?”

167 Yêyè ne: “Ûdi ne dîsaamà dya—dya mu bwongò.” Nenku ùvwa mutungunuke ne kwakula mushindu awu. Nenku, ee, ùvwa—ùvwa ùdyàmbidila ne òvwa dikolè dya dipitepite, nudi bamanye’s.

168 Ki kwambaye ne anu mu tusunsa tukese cyanàànà, cintu kampanda kwenzekaci. Mukaji awu kwambaye ne: “Mukalenge, mêmè ndi mumanye muntu udi mwa kwenza dipanda adi.”

169 Muntu mulume awu kwambaye ne: “Inàbànza, tàngilà, ba-Frères Mayo mbacipangile bambe ne kacyèna mwa kwenzekakù to.” Yêyè ne: “Muntu kampanda kuntweku ùvwa ùmusambidila, dîna dyèndè m’Mwaneetu Branham.” Yêyè ne: “Mmwenzele mwànà ewu disambila.” Yêyè ne: “Anji indila kakese! Wa nsuki mifiike, muvwàle nkooci mutòòkòlòke.” Yêyè ne: “S’nyêyè mukaji awu’s.” Yêyè ne: “Awu ngangabuka ùdi penyì?” Ki kumwambilaye. Kuyaye nendè kuntwaku ne ngangabuka awu kwenzaye dimupanda adi, mwànà awu kuumvwaye bîmpè.

170 Mpindyewu, aci ncivwile ku *Reader’s Digest*, nudi numona’s. Ki ba-Frères Mayo kumbiikidishabò bwa muyiiki pa bwalu abu. Kwambabo ne: “Révérend Branham, cyùdi mwenzèle mwànà awu ncinyi?”

171 Mêmè ne: “Cintu nansha cimwe. Ncivwakù mumulenge to. Mvwa mêmè mwambe anu cívwa Nzambi mungambile bwa kumwambila. Muntu awu pèndè kucitùmikilaye.”

¹⁷² Mpindyewu, cintu cidì cikèmeshà pa bwalu abu, mbingu bu yibidi nanku paanyima pàà cyôci aci, anyì mbingu yibidi kumpala kwa cyôci aci, anyì yisatu, mu *Reader's Digest*, pàmwàpa ngondo mujimà kumpala, kaabwalu kàà Mändèmwàzèlè Piper aku kupàtukakù. Mpindyewu, yèyè awu mmwamùlopò mushùwashùwàlè, anyì mmutempi wa mbùkù. Mpindyewu, kùtu wa cya bushuwa, ne kùtu muntu kampanda ùdi utentula. Bàdi ne mukaji awu kacya mu cidimu cya 1897. Ukaadi ne bidimu bipite pa lukama mpindyewu, mu New York, bônso babidi. . . mpudimaci anu wetù wa mpàtàmàci ewu. *Reader's Digest* awu, petàayi. . . Ngeela meeji ne ncipàtùke ngondo yibidi anyì ngondo umwepele kumpala kwa cyànyì mèmè; ne nudi mwa kucipeta, ku mbilangilu kwa muvù wà mabeji àpòòpoka aku. Mukalenge Baxter ùvwa naaci kaaba aka dituku adi. Bu nansha ne mvwakù mukwèlèlè meeji, nunku ndi mumwambile bwa. . . anyì bu ne mvwakù mumanye ne nèngàmbe cyôci eci, nunku—nunku ndi mulwe naaci. Ndi mwa kunùpetelaci. Nunku cìvwa ne mabeji bu dikumi ne abidi anyì dikumi ne anaayi nanku. Mukaji awu ùvwa anu mukaji wa nzubu wetù wa patupu ewu. Kadi dîngà dituku kutuukaye mikendi, pàvwàye ùsaama, ne kubangaye kwakula ne bafwè. Ki kwendeshabo mukaji awu buloba bujimà, myaba yònsò. Kuyabo nendè ku Angleterre. Kumushintululabo too ne bilàmbà, misangu ne misangu, bwa kumona ní kùvwa bintu bidyànjlila kupàyàmù ne bikwabo, ne kuyabo kuntwaka ne kwenzabo bwa muntu kampanda àdyàlùlè ne cibwikilu kwìsù, mwena Ngelikà, ne kwenzaye bu ne ng'Anglais. Ne mukaji awu kumwambilaye byònsò. Ne yèyè—yèyè—yèyè muntu awu ùvwa muswe kubiikila umwe wa ku bakwèndè bàvwà bafwè.

¹⁷³ Mpindyewu, cintu cimwepele cìvwàku mukaji awu mwa. . . Pa buloba bujimà, kadi *Reader's Digest's* nyèyè ewu mucyàmbe mwaba awu, kaaba aka kùkaadi malòòlò ndambu, anyì kùkaadi ndambu wa ngondo, cimwe cya ku bintu abi's cyèdìibù patòòke. Muntu kampanda uvwabò bèèla meeji ne ùvwa mutwè mishiku ku cyanza cya mukishi wà mamwèndè, kadi dituku dyàkalondà cyàkajaadikiibwa ku tubàdi twa bampulushi ne cìvwàye mutwè mishiku aci cìvwa anu cipese cya cilàmbà cya mousseline. Bantu bûngi cyanàànà bàtentula mwamùlopò! Bàtu anu babadi bàtù bàsòmba kumpengà kwa mùsèèsù aba, bàtù kabàyi baamwamùlopò kwònsò eku to. Bàdi anu batentudi bàà mafi cyanàànà. Kadi kùdi mwamùlopò wa cya bushuwa.

¹⁷⁴ Nunku twètù batendeleedi aba, tudi ne batentudi bûngi cyanàànà ku nseke ne ku nseke. Mpindyewu shààlaayi tàlàlà ndambu wa tusunsa.

¹⁷⁵ Mpindyewu monaayi ne, Mändèmwàzèlè Piper awu mmwamùlopò wa cya bushuwa. Ne cikandakanda aci ncyambe ne: “Cintu cimwepele cidì mwa kumanyiibwa kakùyì mpatà, cidì ne, pàdi muntu ùfwa, kí mmufwè to. Ùdi ne mwoyi mwaba

kampana, bwalu mukaji awu ùdi ùbìikila nyuma wendè ne wàkula ne bantu.”

176 “Mpindyewu, cidi mukaji awu wènza ncinyi, Mwaneetu Branham? Udi wèwè ucìitabuujà anyi?” Eyowa’s, mukalenge. Ki mùdi Bible wàmba, ki bwa cinyi mèmè ndi ncìitabuujà. Kadi yèyè ngwa dyabulu. Ditendeleela dya bakishi ndiyelè dya dyabulu. Mpindyewu monaayi, mpindyewu tàngilàayi bônso babidi abu.

177 Ne pashiishe bìvwa bikèngela nwènù kwikala bamòne mùdi mikanda mimfùndila yilòka bu mvula, pashiishe, pààlu kàànyi kaabwalu kulonda kèndè yèyè. Kabyènakù bikèmesha ne, anu kumpala menemene kwa cikondo cya nshiikidilu, Nzambi mwambe maaluu aa anyi? Bya bwalu *Reader’s Digest* bàtu bàmupàtula mu mwakulu ne mwakulu wònso wà mwinshi mwa dibà. Nwamonu anyi? Monaayi, kabyènakù bikèmesha mùditu tulondàngàne anyi?

178 Mpindyewu ki mikanda mimfùndila kulokayi bu mvula eku, yàmba ne: “Mwaneetu Branham, aci’s cidi cijaadika ne wèwè udi anu mutempi wa mbukù.” Bòbò ne: “Aci ncidi cìcijaadikà. Tàngilà ùmonè, wèwè kwambila mukaji awu kùvwaye mwa kupeta . . . Tàngilàaku ewu mukaji yèyè?”

179 Mèmè kwamba ne: “Anjì indila kakese.” Mèmè kufùnda mukanda wà bantu bônso bamanyè, (mfwilaayikù luse), bwa kuwùtùmina bantu. Mèmè kwamba ne: “Mushindu mwine wùdi bukese bwa dyenu dimanya’s nwènù bayiishi.” Mèmè ne: “Pamutu pàà kubatiiza mibidi yenu, bikèngela kubatiiza bwongò bwenu abu.” Aci’s ncyà bushuwa. “Kanwèna nwènù nwimana bwa kwelanganakù meeji pa bintu to. Kanwènakù nuteeta bwa kubitàngila to.”

180 Mushindu wumwewumwe awu’s ngwàkenzàbo mu matuku makwabo. Bàakamòna Yesu. Bàvwa bamanye ne Ùvwa mwa . . . Ùvwa mumanye maaluu masokòme a mu myoyi yabo. Ùvwa mumanye civwàbo bènza mushindu awu. Kadi bàakamba ne: “Yèyè mmfumu wa baadémons. Yèyè m’Beelèzèbùlà, mwena lubùkù lutàmbe bwìmpè bwa buloba bujimà.” Kabàvwakù bìimana bwa kuteetakù kucyùmwvwa to, bwa kumona ne ùvwa m’Mwànà wa Nzambi. Kabàvwa bàà nyuma bikùmbàne bwa kucìmanya to. Ki cyòcì aci, bàdi bàbadila cintu pampàlapampàla. Bushuwa, Yesu’s ùvwa ne cya kubwela mu Yelusàlemà, mubànde pa mpunda, ne bikwabo, kadi bòbò bàvwa bàtàngila ku Dilwa dya cyakabidi.

181 Ncintu cimwecimwe aci leelu ewu! Bàdi bàtàngidila kumutu kwa cintu cilelela. Aleluuyah! Ncyà bushuwa. Mèmè ndi mumanye ne Nzambi ùdi kaaba aka, mu mapingaja emu, ne ndi mumanye ne ndi munkaci mwa kwangata dibà dyebe dyàbùngì, kadi bikèngela ùmonèku eci, wèwè mulunda wanyì. Bu mèmè ncìyikù mwa kukumona kabidi to, bikèngela ùmanyè cidi

baadémons, bikèngela ùmanyè cidi Bulelela ne cidi ntùpàkànyì. Ne byòbi mbifwànàngàne be, bikèngela ùbitàpùlùlè.

¹⁸² Mpindyewu vùlkààyi ne, kacyàkwikala kwàka nàka, cintu kampanda lwà kule ku *elu* luseke bu mùdi Bafaalèsà, anyi cintu kampanda kule ku *lwàlwa* luseke nansha. Cidi anu apa mene mu ciibi emu, anu pabwìpì naaci. Citàngilaayi. Mpindyewu bu mèmè mwa kwangata . . .

¹⁸³ Twàngatàayi bintu bibidi abi. Mèmè mwangate ndola awu mukupèèshè, mpindyewu, mèmè mukupèèshe ndola wa mafi. Netùkwatè mudimu ne lusumwinu kampanda bwa numone. Cintu cya kumpala cyùdi mufwànyine kwenza, wèwè mwikàle muntu wa meeji matwe, wèwè mwambule ndola ne mumutàngile, cintu cya kumpala, neùmwlengè bwa kumona ne mmwenza ne cinyi. Ncya bushuwa anyi? Neùtangilè ne mbamwenze ne cinyi. Neùtangilè mushinga wèndè. Ndola mulelela kì mmwenza ne dibeji to, ùdi ndambu dibeji ne ndambu swà, nudi numona's. Ne cintu cya kumpala, nebikengelè bwa wèwè kutàngila mushinga wèndè. Ki cileeeji cya kumpala ncyaci.

¹⁸⁴ Nenku mpindyewu twàngatàayi yèyè mukaji awu *elu* luseke; ne twàngatè Mukalenge *elu* luseke, udi ukwàta neetu mudimu awu.

¹⁸⁵ Mpindyewu tàngilàayi, cintu cya kumpala cidi cìkèngela bwa nwèù kumona, byònsò . . . Tàngilàayi kaabwalu keenu aku. Mu bidimu makumi ataanu ne bya mu njila bya ditempa dyèndè dya lubùkù, ne disòkà dya nyuma ya bafwè abi, kacya musangu nansha wumwe kàtukù mutèèle Nzambi, Kilisto, dyondopa dya kùdi Nzambi, disungidiibwa, Cilumbulwidi, anyi nì ncinyi to. Mùdi anu dinaya ne dikutakana.

¹⁸⁶ Kadi *elu* luseke lwòlù, kùdi dībà dyònsò anu Nzambi, Cilumbulwidi, Dilwa dya Yesu, dyondopa dya kùdi Nzambi, bukole bwa Nzambi, disungidiibwa. Tàngilàayi mushinga wàbi. Kwèna umòna batempi bàà mbùkù anyi baamwamùlopò bènda bàyiisha Evanjeeliyo to. Bwalu bùdi cinyi ne bantu? Ekelekele! Monaayi!

¹⁸⁷ Kadi cintu cilelela cya kwenza, paùdi muswe kujandula ne nndola wa cya bushuwa anyi kì nyèyè, yèyè ùtamba kumweneka bu yèyè, tentula nomba yidìpu ayi ùyipingàjè ku nzubu wa dyenzela mfranga. Nenku kwòkù aku kwikàle nomba ya yikùmbanangana ne yòyi ayi, kùdi ndola wa argent mumwindile. Ncya bushuwa anyi?

¹⁸⁸ Ee, dībà adi, mwaneetu, angata cidi mukaji awu mwenze ùcyàlùjè ku Bible, neùsanganè ne mmwamùlopò wa mu Ènè-Dò awu.

¹⁸⁹ Kadi wàngatè cidi apa eci, neùcisanganè, cidi pa Mukanda ewu mu Nzubu wa dyenzela mfranga amu ne: “Yesu Kilisto umwèumwè awu makeelela, leelu, too ne kashidi.” Cya bushuwa, cyenzi Cyèndè cimwecimwe aci's! Yèyè kàakaya

kenza manayi ne dikùtakana ne bantu nansha. Cìvwa mbwà dyakalenga kampanda, bwa kukwàcishakù muntu kampanda, bwa kumufikisha kùdì Nzambi. Amen! Ncyèna “ntwa amen” ndìtwila mèmè to, kadi *amen* mbwena kwamba ne “biikalè nanku.” Ne mèmè ndi...Ndi nCiitabuuja. Ndi mumanye ne Cìdi Bulelela.

¹⁹⁰ Mpindyewu monaayi, ki bwalu mbwòbò ebu. Mpindyewu, lukasa lukasa mpindyewu, bwalu ncyèna muswe kutàmba kunùlama kabidi to.

¹⁹¹ Tàngilàayi, twánjàayi kufila kaadizòla kakese mwaba ewu, kaadizòla kakese kàà mu meeji. Ki musulu ngwòwò ewu wùpicila apa, wùpwekela anu lwà kwinshi *eku*, wùvwila ma mwoyi. Tàngilàayi mpindyewu. Nkajila kàà màyi. Mpàayi maci mpindyewu, bwa eci kacinùpicikù to. Wènda anu wùpweka nunku *ewu*. Mpindyewu, mu kajila kakese kàà màyi aka mmùdì bantu bàà cifwàkà basòmbèle, wèwè ne mèmè. Mpindyewu, mwómò amu, twánjàayi kutàngila ne ncinyi ciine aci. Mmushikì wà dikùtakana ne bikwabo byònsò, kadi ku musangu ne ku musangu neùmònè bukènkè kampanda. Udi umòna mídìmà ne misèsèsù, mmilòwù ne disaluka, démons munkaci mwa kukwata bantu. Kaa, mbavwàle bilenga, ekelekele, ne biikalè ne dipiluka ditumbùke ne mwabo mwònsò, bamanyi bàà mabàlà bàà kapelu, kadi ciikalè anu dyabulu's. Kadi mùdi bàdì balediibwe cyakabidi basòmbemù.

¹⁹² Mpindyewu, bantu bàdì mu kajila aka aba bàdì ne bwenzeji bwa bùfùmina ku nseke yibidi mishìilàngàne. Mpindyewu, ku elu luseke lùyaayà *eku* elu, kùdi busatu kampanda. Ne ku elu luseke lùyaayà *eku* elu, kùdi busatu kampanda.

¹⁹³ Mpindyewu, díbà adi, mpindyewu cya kumpala, ku *elu* luseke, kùdi misuuka ya *babi*, pàdì muntu ùfwa ùdi ùbwela mu mwaba kampanda ùkindila dilumbulwisha. Yesu wàkaya kayiisha misuuka yìvwà mu bùlokò kuntwaku. Bàdì bàlondà mbaadémons. Udi ulonda, ndyabulu mu iferno. Mu kubànda, cya kumpala, mpindyewu, bàdì muntwamu mmikishi, nyuma ya bafwè bàtù kacya kabàyikù banyingàlale to. Mbindile Cilumbulwidi. Cintu cimwepele cìdìbò bòbò bamanyè ndikùtakana ne byàkenzàbo abi.

¹⁹⁴ Mpindyewu, kuulu *eku*, beena Kilisto aba bàdì bàpeta bwenzeji bwa bùfùmina Kuulu. Eci ndusumwinu. Kuulu *eku* kùdi Mukishì mukwabo, Nyuma Mwìmpè, Mukishì wa Muntu, Kilisto Yesu. Nyuma Mwìmpè, Nyuma Mwìmpè ùdi ùfila bwenzeji pa Ekeleeziya Wende mu cipaapu cya bàà cifwàkà eci.

¹⁹⁵ Dyabulu, ku *eyi* nyuma, ùdi ùfila bwenzeji pa bantu. Mpindyewu, tàngilàayi, bàdì bàlondà m'Banjelo. Udi ulonda n'Nzambi. Mpindyewu, muntu yònsò wa cifwàkà pànwapa ùdi ùpeta bwenzeji bwa kùdi cimwe cya ku bipaapu ebi. Nudi bumvwe cìndì njinga kwamba aci anyi?

196 Mpindyewu cìvwà mukaji awu mwenze, ùvwa mukabwele mu cipaapu aci. Nenku ùvwa wàkula ne bantu bakwàta kùdì démon aba bàvwà, ku cibangidilu, nyuma ya banjelo badìshìnde bàvwà kabàyi banyingàlale ku cibangidilu kwàka abu, ne bààkiitabà bwa bóbò kukwàciibwa kùdìyi. Nenku mbindile Cilumbulwidi.

197 Kadi *aba* bàdì apa aba bàdì bàpeta bwenzeji ne mbalediibwe cyakabidi kùdì Nyuma wa Nzambi. Nenku dyabulu ùdì ne bèndè baprofeta, ne Nzambi ùdì ne Bèndè. Nudi bumvwe cìndi njinga kwamba aci anyì? Mbwenzeji, ne ki twètù bààyi abu. Imànaayi bwa kucitàpulula. Yesu, pàvwàYe pànu pa buloba . . .

198 Mpindyewu, leelu ewu, yèyè kèna mwa kubwela mu cipaapu aci bwa kupatula muntu mwakane mu cipaapu aci to. Kì mmufwànyìnekù kucyènza to, bwalu bantu baakane kabeena mu mwaba wùvwàbo bàsanganyibwa kale awu to, mu Mpàlàdiizò amu. To, mukalenge. Mpàlàdiizò wàkuumushiibwa, pàakamuumushà Mashi a Yesu apu. Tàngilàayi kuneeku. Ekelekele!

199 Bu mèmè mwa kwelakù meeji mùvwà Yesu, pàakafwàYe, Yèyè kuya kayiisha misuuka yìvwà mu bùlokò. Yèyè wàkafwà, ngènzàmpèkààtù, kàyi mumanyè mpekaatu nansha umwe to, kadi mpekaatu wetù twètù ùvwa pambidi Pèndè. Nenku Nzambi, bwa mpekaatu Yèndè ayi, kumutumaYe mu iferno. Bible mmwambe ne: “Yèyè wàkaya kayiisha misuuka.”

200 Bamwe bantu bàdì bàmba ne: “Mwaneetu Branham, mèmè ncyèna mwa kucyùmvwà.” Bàmba ne: “Yesu wàkabìika ku lufu mu diituku diisàtù. Yèyè wàkafwà mu diitànù mu mapingaja ne wàkabìika ku lufu mu dyalumingu mu dinda, mona's, Yèyè's ùvwa mufwè dituku anu dimwepele.”

201 Yèyè mmwambe ne: “Munda mwa cikondo aci,” bwalu Yèyè ùvwa ne Mufùndù wumwepele mu Bible, pàvwàYe mwa kwimanyina. Bwalu, Davìdì, muntu wàkatwà cìmpìngà pashiishe, kadi uvwa musungidiibwe, kadi muprofeta mu disonsodiibwa dya Nzambi awu, wàkamba ne: “Ncyàkulekela musuuka Wèndè mu iferno, anyì Ncyàkwitaba bwa Wa Cijila Wanyì àmonè dibola nansha.” Ne yèyè ùvwa mumanye ne, matuku asatu a muunya ne a bufuku, mubidi awu wùvwà mufwànyine kumona dibola. Ne Nzambi ùkaavwa mwambile muprofeta awu ne: “Yèyè kààkumòna dibola nansha.” . . .? . . . [Katùpà kàà mukaba wà mèyi munda mutupu—Muf.]

Aleluuyah! Yèyè wàkangata Dìyi dya Nzambi. Wàkacimuna Sàtaanà, musangu wònsò, ne Dyòdì adi. Wàkacimuna lufu, ku Dìyi dya Nzambi. Aleluuyah! Wàkacimuna lufu. Ne pàkaMushebeyàbo, ne kufwàYe, ngènzàmpèkààtù, mpekaatu yànyì ne mpekaatu yebe pambidi Pèndè, Yèyè wàkapweka, mèmè ndi mwa kuMumona ùkookola ku ciibi aci kuntwaku.

Ki misuuka mijimine ayi kupatuka e kwambayi ne: “Ee, Wèwè udi Nganyi?”

202 Yèyè ne: “Nwènù aba kanwàkatèèleja Henòkà bwa cinyi? Kanwàkatèèleja bakwabo baprofeta bàakayiishà abu bwa cinyi?” Bàvwa bapùishìibwe. “Mémè ndi Mwànà wa Nzambi wàkiikalakù ne mwoyi musangu kampanda awu. Ndi ne... Mashi Àanyi mmediibwe panshi. Ndi mulwe bwa kunwambila ne, Ngàkùmbaji, civwà baprofeta bambe ne Mémè nêngènzè aci.” Kupweka buludi kupita ne mwaba wùvwà baadémons awu, kukabwela buludi mu iferno, kunyenga dyabulu nsapi wa lufu ne wa iferno, kuyikùdika ku luseke Lwèndè, kwasa dyaluka wènda ubànda. Aleluuyah!

203 Kufika pa dinda bwebwebwe. Aleluuyah! Twànji twènzàayi kaadizòla kakese mwaba ewu. Pa dinda bwebwebwe, kùdi musùmbà mukwabo mwikàle wùsanganyiibwa mu Mpàladiizò emu. Kabàcyènamù mpindyewu to.

204 Mpindyewu, nwènù balunda bàanyi banene bàà beena Katolike bàdi bìtabuuja dyakwilangana dya bansantu. Nwènù nwakula ne munsantu kampanda mu ekeleziya wenù, muntu awu nngènzàmpèkààtù, ùdi mu iferno, anyi—anyi mwindile muntwamu dilumbulwisha dyèndè. Kadi pùikalàbi ne úvwa munsantu, ùdi mu butumbi bwa Nzambi ne kèna mwa kwalukila to. Neya bushuwa. Ndi mwa kujaadika aci. Mashi a bimpàngà bya ngombe kaàvwakù mwa kuumusha mpekaatu to, kadi Mashi a Yesu àkakòsolola ne mpekaatu.

205 Ndi mwa kumona Yesu ùbànda, mwaba wùvwà Mpàladiizò, ki mukulumpe Abraham, Izàkà ne Yakòbò bàba, ne bakwabo muntwamu, Samwèlè ne bònsò bàà kùdìbo muntwamu. Ndi mwa kuMuumvwa ùkookola ku ciibi. [Mwaneetu Branham ùdi ùtuuta bintu pa cyambilu misangu yisambombo—Muf.] Amen! Kaa, ndi munange eci. Ndi ngenda ndwa anu... Ndi ngumvwa bu butendeledi bumbwela mpindyewu. Ndi mwa kuMumona ùtàngila muntwamu. Ndi mwa kuumumvwa wàmba ne: “Udi apu nganyi? Udi apu Awu nganyi?” Yèyè ne: “Mémè, ndi Abraham udi wakula. Nganyi?”

206 “M’Mémè Dimiinu dya Abraham adi.” Amen. Ndi mwa kumona Abraham ùlwa ku ciibi, ùkàngula ciibi. Yèyè ne: “M’Mémè Dimiinu dya Abraham adi.”

Danièlè kwambaye ne: “Tàngilàayi kwàka! S’ki Dibwe dīngààkamòna dijoomoke ku mukuna dyàdya.”

207 Ndi mwa kuumvwa Yèhezèkèlè wàmba ne: “S’ki Yèyè wàwa! NgàkaMumòna, byenzè bu lupwishi mwinshi mwa makàsà Èndè, mavuba ènda àya, pàdi bimpàngà bya mikooko... bituuta bikàshi, mabeji, byònsò byèla mbila.” Kaa, ndi mwa kumona bantu bashiilèshiiàngàne mu Mpàladiizù amu, baMwindile.

208 Ndi mwa kuMuumvwa wàmba ne: “Lwàyi! Kwìsù nkwekù kùkaadi kùtòoka mu Yelusàlèma. Bikèngela tùpatukàayi

mwab'ewu. Tudi tubànda, bwalu nwâkeeyemena mashi a bimpàngà bya ngombe ne a mbuji, bindile cikondo cya Àànyì Mashi. Kadi Mashi Àànyì mmamana kwela panshi ku Kalvariyo kwàka. Mèmè ki Mwànà wa Nzambi mwandamuke mubidi. Mabànzà ònsò a mpekaatu àmanyi kufuciibwa. Tudi mu njila bwa kupatuka!" Aleluuyah! Butumbi kùdi Nzambi!

209 Ndi mwa kumona Abraham ùkwàta Sarah ku diboko, nenku ki bôbò bàlwalwà aba, bàpàtuka buludi! Mu Maatàayi 27, pàakapàtukàye, Ndi mwa kubùmvwà bànji kwimanakù ndambu mu Yelusàlèma amu. Nenku katanci aka, ndi mwa kumona Kaayifà ne bakwabo biimàne mu mùsèèsù, bàmba ne: "Bàdi bàngambila ne mulumyana awu mmubiike ku lufu. Mona, wàwa mulumyana uyààya kwàka nganyi; nsongàalùmè wàwa, nsongàakàji wàwa?"

210 Kabàciyi kabidi banunu to; bàvwa ng'Abraham ne Sarah. Nenku kujiminabo. Bàtàngila nunku: "Muntu kampanda ùdi ùtùbandila." Bàvwa mwa kujimina anu mùvwàYe Yèyè ùpìcila mu cimanu amu, mubidi wà mushindu wumwewumwe awu. Aleluuyah! Cya bushuwa's. Ki baprofeta ne bakwabo bònsò mbôbò aba, bènda bèndakana, bàtapa dísù ku cimenga.

211 Nenku Yesu mmulombole njila wà diya muulu mu, anyi kuulu kwa mitooto, ngondo, mavuba, ne mukwate bupika ku bupika, mupèèshe bantu mapà. Yesu mmusòmbe leelu ewu ku dyabalume dya Taatù, mubànde muulu amu, musòmbe, too ne pààvwijiibwà beena lukuna Bèndè citèekedi cya makàsà Èndè.

212 Nenku leelu ewu, wèwè mulunda wanyì mwena Kilisto munanga, démons yidi yìkwata mudimu ku nseke yònsò. Ne Nyuma wa Nzambi ùdi ùpàtuka, ku luseke lukwabo, bwa kuyipangisha musangu wònsò. Aleluuyah! Ki bwalu mbwòbù abu's. Bibejibeji ne bikòsò bya nguumù ne bikwabo byònsò ki kubyàmbabo eku. Bàdi munkaci mwa kubitàngila. Kabeena mwa kuumvwà ne mbinganyì to. Ncinyi aci? Ncimanyinu cidyanjididi cya diteetangana dinene dya makàndà dilwalwà abidi àdi panshi aa, pankaci pàà Nzambi ne dyabulu. Lwà ku luseke lwà Nzambi wìkalè mujaalàme munda mwa mwoyi wèbè. Amen.

213 Anu abidi àdi panshi aa mvwa mu Toledo, Ohio, ngenza disangisha. Nkàadi njikija.

214 Nudi bumvwe cìndi njinga kwamba pa bìdi bitàngilà démons anyi? Yidi munkaci mwa kukwata mudimu. Mmitendeleedi ya dikema, anu mitendeleedi yetu eyi! Kaa, yidi yìya mu ekeleeziya mu dyalumingu dyònsò, yàmbulula Diitaba dya Bapostolo, ne yimba musambu wà Tumbishàayi Mfumù. Kaa, ekelekele, miikàle anu mitendeleedi ne mwàyì mwònsò!

"Mwaneetu Branham, udi muswe kwamba ne aci ki Bulelela anyi?"

215 Nyuma wa mushindu awu's ki wâkakùdika Yesu Kilisto ku nkuruse's. Ne Yesu wâkamba ne: "Nudi bàà tatwèñù, dyabulu."

216 Mpindyewu bamwe bantu bàtu bambe ne: "Kaa, Russie's ki mufwilakanyi ne Kilisto." Nansha kakese! Russie kî ngudi mufwilakanyi ne Kilisto to. Mufwilakanyi ne Kilisto neìkalè mutendeleedi wa menemene mu mushindu wà ne yèyè neàkutakajè ne Basungula mene bu ne bìvwa mwa kwenzeka.

Vùlukàayi ne, Nzambi ùtu wàngata muntu Wendè, kadi kàyikù wàngata Nyuma Wendè to, Dyabulu ùtu wàngata muntu wendè, kadi kàyikù wàngata nyuma wendè to, Mpindyewu, ki bôbò abu. Enza muwàswà amu. Mémè ndi mwambule bujitu anu bwa Bulelela.

217 Démons, yìkwàta mudimu! Makeelela, mvwa mwakule pa yôyi mu cipaapu cya mubidi. Leelu, ndi nnuleeja mu cipaapu cya nyuma, mùdiyi mu cipaapu cya maalu a ntendeleelu. Mwaba wùdiyi kuntwaku, bàyibìikila ne nkansere, ne bàdi bàyibìikila ne *ncikampanda*, *cikansanga*, ne *cikankenga*, kadi mémè ngânjuaadikìdi, ku Bible ne, ndémóns. Mpindyewu, apa nunku, leelu ewu, s'ki yôyi eyi cyakabidi mu cipaapu cya maalu a ntendeleelu, mitendeleedi ya dikema, yileeja kaneemu kakole bwa ntendeleelu.

218 Bu wèwè mwa kwanji kuya ku ntwadijilu, wèwè mwaneetu, ne kwelanganaku meeji. Kaayinà, ntwadijilu mene waci, yèyè's ùvwa mutendeleedi wa mu umwe. Esawù ùvwa mutendeleedi wa mu umwe. Yudààsè ùvwa mutendeleedi wa mu umwe. Cintu's nntendeleelu. Kî mbantu bàà pambelu to. Bwalu bùdi anu mu mikolo. Tàbaleelaayi aci, dilonga dya maalu a baadémóns adi! Pàmwàpa pashiishe ndambu, musangu kumpala, nêntambè kulenga bwalu abu ndambu. Dìbà dikaadi diya.

219 Kanwikadi nupiishangana kabidi to. Nangàayi bantu bônso. Pawikalà kùyi mwa kunanga byùmukila munda mwa mwoyi wèbè to, nanku Kilisto kèna neebe to.

220 Mu Toledo, Ohio, mémè kubwela mu nzubu mukese kampanda wa cidilulu. Nkàdikù mudyè mu mwaba kampanda, mwaba mukese wà Dunkard, kaaba kakese kalenga be. Bàvwa ne musàngèelu wàbùngì. Mu mapingaja awu bàkaavwa bakàngè, bwa kuya mu kalaasa kàà Dyalumingu. Nenuk pàakayàbo, byàkakèngela bwa mémè kuya dinsambù dya mùsèèsù, ku kaaba kampanda kàà kale kàà bantu bàà maalu a pa buloba, ne mémè kubwelamù. Ne ntu mumanye ne kunaya kwa manayi a mfranga kakùtu kwanyìishiibwe mu Ohio to. Kadi Mpulushi kampanda wa mbùlamàtadi ùvwa mwaba awu mwele mwànà wa bakaji kampanda diboko kunshingu, ne cyanza cimulembelejila pa cyàdi lwà apa, mwikàle ùnaya ku mashinyi a binjànjà bya mfranga. Mikenji ya provinces yetu ne ya ditunga, byónsò's mbifwè. Bya luse be!

221 Mémè ndi mweyemene Kilisto Lubwebwe lushindàme, ki pândi mwimane, myaba mikwabo yònsò ndunteka. Kakücyèna cìdì cishààle nansha cimwe to. Ncya bushuwa.

222 Mémè kutùma mèsù paanyima apu, pàvwa nsongààkàjì mulenga kwìsù, pàmwàpa wa bidimu dikumi ne bya mu njila, dikumi ne citeema, dikumi ne mwandamukulu, bidimu dikumi ne citeema. Ne ciine cìvwàbo bènza aci, bânà bàà balume bàvwà banyùngùlùkile mèesa abu, s'cìvwa cyènza ne bwòwà. Mémè kusòmba mwaba awu. Kadi mpindyewu cyàlu kunkèmesha ncya ne, mvwa musòmba mwaba wàlu nsongààkàjì kampanda, kwambaye ne: “Udi muswe nkwasanya?”

Mémè ne: “Twasakidila. Mvwa nkèbakù didya dya mu dinda.”

223 Kadi mu nkwasanya kampanda emu, mùvwa musòmba mukaji mushindame, wa bukole bumwe ne wanyì mààmù, wa bidimu makumi ataanu ne bitaanu, makumi ataanu ne mwandamukulu. Ùvwa muvwàle kàmwe kàà ku tùpanù twa katüyi kaneemu tùdìbo bàvwàla etu.

224 Bàdì bóbò bàmba ne ntwà tùpìcishanganakù kapeepà. Maalu a mamanya's àdì àmba ne: “Nudi bapàle.” Cya bushuwa, kì mmùdìbi to. Cyùdì ukeba cìdì anu bwa kuleeja butaka bwebe. Ncya bundu, dipanga dya ngàsà. Inàbànzà kààkutùvwàlakù to. Mukaji kaayì neàtùvwàlè, kadi inàbànzà to.

225 Ki dìbà adi, nenku dìbà adi bóbò. . .ki yêyè awu, musòmba mwaba awu. Mubidi wèndè wà mukwàte ne bya luse awu wùvwa mufwatalale. Ùvwa mudilaabè bintu bya mushindu bu wà cìlòngò cya mbuji, mwònsò munùdì nubìbìkìla amu, ku mishiku. Kabidi ùvwa ne nsuki mikòsakù ndambu bu ya muntu mulume, mishitákàne yònsò; cìdì Bible mwambe ne, ncya bundu aci. Ne mukaji, udi mulume. . .

226 Bible ùdì wàmba ne, mukaji yêyè mukose nsuki yèndè, mulume ùdì ne bukenji bwa kumwipata ne kushipa nendè dibaka, bwalu kèna nendè ne meeji matooke to. Bikèngela twètù kudìfila ku diyìisha dya Bible kaaba aka dimwe dya ku matuku aa. Mmwambe ne: “Mukaji yêyè mubebùle nsuki yèndè, ùdì ùfwisha bàyèndè bundu.” Yêyè wa ùfwishangana bundu, bivwa bikèngela kwipaciibwaye ku dibaka. Kwèna mwa kusela mukwabo to, kadi udi mwa kumwipata yêyè awu. Yoyòyò! Balumyana wa yààya, aci, aci's cìdì cyènda cìbwela, mùndì ngumvwa. Kadi aci's m'Bulelela.

227 Kaa, kale wàwa, tuvwa naaci mu bipaapu bya Nyuma Mwìmpè, kadi tukààdì bashiye biibi bwàshì. Mwaneetu mukulumpe kampanda ùvwa ne ciibidilu cya kwamba ne: “Tukààdì bashiye biibi bwàshì, tukààdì bashiye biibi bwàshì, tukààdì badyè cibanga pa bìdì bitàngila mpekaatu. Tukààdì bashiye biibi bwàshì, mikooko mipatuke, kadi mbuji yàbwedì bishi?” Nwènú mbàkaadì bashiye biibi bwàshì. Ki cìvwà lutatu

ncyôci aci. Nudi bashiye biibi bwàshì, maalu a pa buloba ne ekeleeziya byádisangi. Anu mùvwà beena Moàbà ne bakwabo, ne Baalàmà, ne mwàkabàsangàye mu dibaka, ncintu anu cyôci cimwecimwe aci menemene leelu ewu. Nenku ekeleeziya wàlu mukooyike yònsò, ne cikondo cya beena Mpenta ncyôci cikondo cya Laòdikiyà, cìdi cìlwa civùmvù, ne cìlùkiibwa mukana mwa Nzambi. Kadi mu cisumbu cyònsò aci, Nzambi ùdi ùbiikila bàshààdilè Bèndè, ùya Nendè Kumbelu, ncyà bushuwa menemene, menemene, ku dìbiikà dya ku lufu.

228 Nenku ki mukaji awu mwaba awu, musòmbe mwaba awu, bilaabu bya ku mishiku kwisù kwònsò, ne bìvwa myaba yònsò mushindu awu. Ne yèyè ùvwa ne bintu bifike ebi lwà kuulu kwa mèsù eku, ne ùvwa ùkòpakana, cisùùlùlù cìpweka. Ne mukwàcikwètù awu ùvwa mufwànyine kwikala ne tunkànunwina. Ne ùvwa musòmbe mwaba awu ne bantu balume bakolè babidi, ne umwe wa kùdibo mudjìngile citambalà mu nshingu, ne ciine aci mu ngondo mwisambombo, musòmbe mwaba awu. Nenku mulume awu kujuukaye, ne ùvwa pèndè bu uvwa unwà maala, ne mukaji awu ùvwa ùnwa pèndè. Ne mukaji awu ùvwa ùkènzakana.

229 Mémè kudyàmbidila ne: “Éyì Nzambi! Nzambi, bwa cinyi kùyikù Wèwè ukupula anu cyanààna cintu eci cyònsò pa karta? Bwa cinyi kùyì wenzakù nanku’s Wèwè? Sharon wanyì mukese awu. . . Mwanànyì mukese wa mu diboko awu, Sarah wanyì mukese wàwa ne Rebekah wanyì mukese wàwa bikèngela bàkoleshiibwè mu lukòngò alu, bwa kulwabo kukùngamangana ne bintàkanyì bya mushindu wàwa anyì?” Mémè kudyàmbidila ne: “Anjì tàngilà anu mu myaba ya dipìcishila kapeepa eyi ne bikwabo, ne maalu àdì ènzekamù.” Mémè kudyàmbidila ne: “Éyì Nzambi! Kaa, ndikù ne disanka muWàkangatà Sharon pìikalàbi ne cìvwa ndiswa Dyebe. Rebekah wanyì mukese wàwa ne Sarah mukese—mukese wàwa bikèngela bàkoleshiibwe mu bintàkanyì bya mushindu wàwa anyì?” Bya bwalu, ne bòbò bantu abu bàdi bàbàbiikila. . . bìmba mu kòralè ne bikwabo byònsò. Ki mémè kudyàmbidila ne: “Kì mbundu anyì?” Mémè kudyàmbidila ne: “Nzambi, mmunyì mùdì bwakane Bwebe bwa Cijila mwa kutwàlakù ciine cyàcya’s? Mbimweke anu bu ne cijji Cyebe cyakàne ncifwànyine kutùdisha mwaba wàwa ne—ne kuwùtaayisha.”

230 Ki mémè kumvwa Mwanjelo wa Mukalenge, wàmba ne: “Vwilà ku luseke.” Mémè kuyakù. Nenku Yèyè mmwenze anu ujikija naanyì, mémè kudyùmvwa anu bu muntu mushiilàngàne’s. “Cyùdi umupiishila yèyè ncinyì?”

Mémè: “Tàngilà cyàcya, mushindu wùdì mukaji wàwa.” Kadi monaayi cìvwàYe. . .

231 Mémè kumona cikeena-kumona. Mémè kumona buloba mushindu ewu, kabùlungù, buloba bukwabo. Kadi *ebu* buloba,

bùvwa ne mwanzankongolo mubùnyùngùlùkile, ne cìvwa m'Mashi a Kilisto àdi àkùba ku ciji cikole cya Nzambi. Yèyè kàvwa mwa kutàngilapù to, Yèyè—Yèyè mmufwànyine kubutula cintàkanyì eci mpindyewu mene, bwalu Yèyè wàkamba ne: “Dituku diwàkùdyà, dituku adi neùfwe.” Ki cidìYe mufwànyine kwenza.

²³² Pashiishe mèmè kudyàmbidila mushindu ewu. Mèmè kudimòna mèmè mwine. Nansha mùvwàbi ne ncyàkenza cyòci aci to, kadi mvwa ngènzàmpèkààtù, nansha bya munyì. Nenku dībà adi Mashi a Yesu Kilisto àdi ènza kumpala kwetu bu cikàndiki. Nwamonu anyi? Mu mushindu wà ne, pàndi ngenza mpekaatu, mpekaatu yànyì yìvwa yidituuta kùdìYe Yèyè ne yìkadikùma ku mutu Wèndè wà musinga mukole awu, ne mvwa mwa kumona binsonji ne Mashi bipweka. “Mufwilèku luse, Taatù, kí mmumanye cidìye wènza aci to.” Ne mvwa ngenza cikwabo cintu ne cìkatuutaKù. “Mufwilèku luse, Taatù.”

²³³ Bu ciMupìte, mèmè's mvwa mwa kwikala mubutudiibwe. Ne bu mèmè anu mudidinge mubenge ngàsà Wèndè, kadi dituku dyàsà musuuka wànyì lwendu bwa kuya dyàmwàmwa, mèmè's nkàadi mumane kulumbulwishiibwa. Ngàamanyì kubenga. Kì nkushàale cintu nansha cimwe to anu dilumbulwisha. Mulumbulwishiibwe, nkàadi mumane kulumbulwishiibwa. Nzambi wàkamba ne: “Dituku diwàkùdyà, dituku adi neùfwe.” Udi mulumbulwishiibwe kujikè. Ewu nnkwasa wa cilumbulwidi mu mapingaja emu, lwidì lwebe kùdì Kilisto.

²³⁴ Ki dībà adi mèmè kudyàmbidila ne: “Eyowa, aci ncyà bushuwa.” Ki mèmè kumona dīngà dituku mèmè ngenda nkalaba too ne pàvwàYe apu. Mèmè kumona mukanda wànyì wà kale mutèeka mwaba awu, ngènzàmpèkààtù, byònsò bifundamù. Mèmè kumona ne mpekaatu yànyì nyìvwa yìcyènza, ki mèmè kwamba ne: “Mukalenge, Udi mwa kumfwilakù luse anyi?”

²³⁵ KubwejaYe cyanza Cyèndè mu lubadi Lwèndè, e kupàtula ndambu wa Mashi, kucifùnda kuulu aku, wàmba ne: “Mufwidìibwe luse.” KuwimanshaYe mu mbù wa cipwàmwòyi, bwa kubenga kucivùluka cyakabidi. Cyàkaya bwa kashidi! KwambaYe ne: “Mèmè's nyawu nkufwila luse, kadi wèwè udi umupìisha yèyè.”

Aci kushintululaci mmwenenu wànyì. Mèmè kwamba ne: “Mukalenge, fwàku luse.”

²³⁶ Pàngààkapàtukàmu, mèmè kuya e kusòmba. Mèmè kwamba ne: “Wetwawu, mwàbànà!”

Yèyè ne: “Kaa, wetwawu.”

²³⁷ Ki mèmè kwamba ne: “Bu wèwè mwa kumfwilakù luse,” mèmè ne, “mèmè ndi Révérend Branham, mwambi.”

Yèyè ne: “Kaa, mfwilèku luse. Mfwilèku luse, Révérend Branham.”

238 Mémè kwamba ne: “Inǎbǎnzà.” Mémè kumulondela mùvwà bwalu. Mémè ne: “Mvwa mwimane kaaba kàka, mwikàle nkupìisha, ne ndyàmbidila ne: ‘Cintu cibì kaayi!’ Pàmwǎpa wèwè ewu udikù ne bǎnà.”

Yèyè ne: “Ndi naabo.”

239 Mémè ne: “Cidì cyèza ne maalu ànyangukè ncinyi?” Kubangaye kumvungulwila bwalu bùdi bufwànyine kupanda mwoyi wà nì nganyi ní nganyi yònsò. Mémè kwamba ne: “Mvwa—mvwa munkaci mwa kukonka Nzambi bwa cinyi Yèyè kàyikù anu ùkòmba bya nanku awu pa buloba. Mona, wèwè kaaba aka ne balume babidi bakwàcike maala aba, ne wèwè mwine, peebe mukwàcike.” Ki mémè kwamba ne: “Dìngà dituku... Mashi awu ngàdi makwàte ciji cikole cya Nzambi bwa kacikulengì to. Newikalè mwa kufwa dimwe dya ku matuku àdi panshi aa. Nenu, díbà adi, wèwè udi—wèwè udi ne budishikaminyi bwa disungula patùdi twakulangana apa, udi mwa kubenga anyi kwitaba.” Mémè kwamba ne: “Kadi dìngà dituku musuuka wèbè newikalè mwa kuya dyàmwàmwa, mùdi kamùciyi luse to. Ne wèwè mufwe mu mpekaatu yebe ayi, ukàadi mumane kulumbulwishii bwa, ne neùye mu iferno.”

240 Nudi bamanye mùdi bwalu anyi? Mukaji awu kupulumukaye mu nkwaswa awu mu nzubu wa cidìilu awu amu. Twètù kwenza disangisha dya milombo dinùtù kanùyikù banji kumvwa to kacya bǎànùlela, nenu kulwaye kùdi Kilisto. Civwa ncinyi? Kanùbàpiishi to; bǎmbilaayi Evanjeeliyo. Mbakwàta kùdi démons; mbàa cifwàkà mu cipaapu eci. Bàdi ne bwenzeji bùùmukila apa. Bwetu bwenzeji twètù bùdi bùùmukila kuulu. Tùmonàayi citùdi mwa kwenza ne mapà etu a cileledi, bwa kupetela Kilisto bakwabo.

241 Taatù wetù wa mu Dyulu, tudi tuKwela twasakidila bwa bwìmpè ne luse Lwebe. Ùmfwilèku luse, Mukalenge; pàmwǎpa, bantu, ndi mubàlamè kaaba aka ntanta mule. Kadi bu mùdibi ne ndyoya dya masangisha aa a mu mapingaja mushindu ewu, mvwa muswe kubàmbila, “baadémons,” kadi ndi mutámbe kucikòsa tutùpà tutùpà mu kaaba kamwe, mu diyiiisha dimwepele, kadi pàmwǎpa bòbò bàdikù mwa kwenda kutwàngulula, apa ne pààpa, ne kuumvwakù cìmvwà njinga kwamba. Wèwè ngudi mumanye meeji a mu mwoyi wànyì, pa kucitwàla.

242 Swaku bwa bantu bùùmukè kaaba aka mu mapingaja emu, ne balume ne bakaji bàtabaleelèku cyenzedi cyònsò cidìbo bènza, kadi bìikalè ne mwoyi mu disanka ne badishikàmine. Bàmanyèku ne Nzambi wǎbàsùngidi. Ne bàMutàngidilèku Yèyè, bǎpwe mwoyi tusumbu twònsò ne bintu bìdi bibànyùngùlùkile, ne bìikalè ne nsòmbelu wa ditalala ne dicincika dya maalu, ne mu dicìinà dya Nzambi. Nenu díbà adi, Nzambi, paWàsàwà kukwàta naabo mudimu bwa cintu kanà cyònsò, Udi mwa

kwakulakù naabo buludi ne kubàtùma kwònsò Kùdi muswe bwa kuyabò aku anyi cyònsò cyùdi Wèwè muswe bwa kwenzabò. Swaku bwa bantu bìikalè badipwekèshe ne bàpetè Kilisto mu myoyi yabo. Tùfwilèku luse, Mukalenge, ku mapangila etu, yònsò wa kutùdi.

²⁴³ Ne tudi bamanye ne—ne Sàtaanà ki kutàmbakanayè eku mwenzè bu nyama wa ntambwe mwikàle ùkungula, myaba yònsò, wènda ùdya cìdiye muswe, muvwàle bibwikilu bya maalu a butenteleedi. Èyì Nzambì, bânà bakese bàdi bakwàte ne bya luse aba, ùbàtàngilèku, myaba yònsò. Bàdi patòòke ne bazànjika kùdi bantu. Nenku ndi nKulòmba, Nzambi, bwa kwikalakù ne luse kùdìbo, ne kusungila bajìmine bònsò, kwòndopa babeedi. Kabidi, Nzambi, tudi tufika ku dimanya ne démons ya kale ya mabeedi yìdi yilwa pa bânà Beebe eyi, Wèwè udi ne difuta dya cibawu dyàmwàmwa, bwa kutàngilakù bwalu abu. Ne démons yònsò yìdi mifwànyine kubàfikisha ku dyenza dya mpekaatu ayi, Wèwè udi ne difuta dya cibawu dísanganyiibwa dyàmwàmwa, diikalà mwa kutàngilakù bwalu abu. Nenku ndi ndomba bwa Wènzèku nanku mu Dìna dya Yesu. Amen.

Ndi ndikonka ní kùdikù . . .



DILONGA DYÀ MAALU À BAADÉMONS — CIPAAPU
CYÀ MAALU À NTÈNDELEELU LUA53-0609A
(Demonology – Religious Realm)

DILONDANGANA DYÀ DILONGA DYÀ MAALU À BAADÉMONS

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diibîdi mu mapingaja, mu matuku 9 a ngondo mwisambombo, cidimu cya 1953, ku Roberts Park Amphitheater mu Connersville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org